

五代史

革



五代史記卷第六十

職方考三

宋歐陽脩撰 徐無黨註

嗚呼自三代以上莫不分土而治也後世鑒古矯失始郡縣天下而自秦漢以來為國孰與三代長短及其亡也未始不分至或無地以自存焉蓋得其要則雖萬國而治失其所守則雖一天下不能以容豈非一本於道德哉唐之盛時雖名天下為十道而其勢未分及其衰也置軍節度號為方鎮鎮之大者連州十餘小者猶兼三四故其兵驕則逐帥帥彊則叛上土地為其世有干戈起而相侵天下之勢自茲而分然唐自中世多故矣其興衰救難常倚鎮

兵扶持而侵凌亂亡亦終以此豈其利害之理然歟自僖
昭以來日益割裂梁初天下別為十一南有吳浙荆湖閩
漢西有岐蜀北有燕晉而朱氏所有七十八州以為梁莊
宗初起并代取幽滄有州三十五其後又取梁魏博等十
有六州合五十一州以滅梁岐王稱臣又得其州七同光
破蜀已而復失惟得秦鳳階成四州而營平二州陷於契
丹其增置之州一合一百二十三州以為唐石氏入立獻
十有六州于契丹而得蜀金州又增置之州一合一百九州
以為晉劉氏之初秦鳳階成復入于蜀隱帝時增置之州
一合一百六州以為漢郭氏代漢十州入于劉旻世宗取

秦鳳階成瀛莫及淮南十四州又增置之州五而廢者三
合一百一十八州以為周宋興因之此中國之大畧也其
餘外屬者強弱相并不常其得失至於周末閩已先亡而
在者七國自江以下二十一州為南唐自劔以南及山南
西道四十六州為蜀自湖南北十州為楚自浙東西十三
州為吳越自嶺南北四十七州為南漢自太原以北十州
為東漢而荆歸峽三州為南平合中國所有二百六十八
州而軍不在焉唐之封疆遠矣前史備載而羈縻寄治虛
名之州在其間五代亂世文字不完而時有廢省又或陷
于夷狄不可考究其詳可見者具之如譜

州 梁 唐 晉 漢 周

汴 都 有武宣 都 都 都 都

洛 都 都 都 都 都

雍 有平永 都 有晉 有 有興

兗 有寧奉 有 有 有 有

沂 有 有 有 有 有

密 有 有 有 有 有

青 有盧平 有 有 有 有

淄 有 有 有 有 有

齊 有 有 有 有 有

棣 有 有 有 有 有

登 有 有 有 有 有

萊 有 有 有 有 有

徐 有寧武 有 有 有 有

宿 有 有 有 有 有

鄆 有平天 有 有 有 有

曹 有 有信威 有罷 有信彰

濮 有 有 有 有

濟 有 有太祖 置

宋 有武宣 有德歸 有 有 有

亳 有 有 有 有 有 有

單 有輝州 有啓白 有 有 有 有

穎 有 有 有 有 有 有

陳 有 有 有鎮安 有軍廢 有復

蔡 有 有 有 有 有 有

許 有匡國 有忠武 有 有 有 有

汝 有 有 有 有 有 有

鄭 有 有 有 有 有 有

滑 有宣義 有義城 有 有 有 有

襄 有初思義後復為南唐 有 有 有 有 有 有

均 有 有 有 有 有 有

房 有 有 有 有 有 有

金 有蜀武雄 有蜀威勝 有懷德 有尋罷 有 有

鄧 有宣化 有罷軍 有 有 有 有威勝

隨 有 有 有 有 有 有

郢 有 有 有 有 有 有

唐 有 有 有 有 有 有

復 有 有 有 有 有 有

安 有宣威 有安遠 有罷軍 有復 有罷

甲 有 有 有 有 有 有

蒲

有護國

有

有

有

有

孟

有河陽三城

有

有

有

有

懷

有

有

有

有

有

晉

有初曰定昌後曰建寧

有建堆

有

有

有

絳

有

有

有

有

有

陝

有鎮國

有義

有

有

有

虢

有

有

有

有

有

華

有威化

有鎮國

有

有

有罷軍

商

有

有

有

有

有

同

有忠武

有匡國

有

有

有

耀

岐義勝有崇州靜勝

有復曰耀改順義

有

有罷軍

解

岐靜難

有

有

有隱帝置

有

邠

岐靜難

有

有

有

有

寧

岐

有

有

有

有

慶

岐

有

有

有

有

衍

岐

有

有

有

有

威

岐保大

有

有高祖置

有

有改曰環州

廊

岐保大

有

有

有

有

坊

岐

有

有

有

有

丹

岐

有

有

有

有

延

岐忠義有

有武彰

有

有

有

夏

有難定

有

有

有

有

銀

有

有

有

有

有

綏

有

有

有

有

有

宥

有

有

有

有

有

靈

有朔方

有

有

有

有

鹽

有

有

有

有

有

岐

岐鳳翔有

有

有

有

有

隴

岐

有

有

有

有

涇

岐義彰有

有

有

有

有

原

岐

有

有

有

有

渭

岐

有

有

有

有

武

岐

有

有

有

有

秦

岐武雄有

有

蜀

有

成

岐

有

有

蜀

有

階

岐

有

有

蜀

有

鳳

岐蜀武興有

有

蜀

有

乾

岐李茂貞有

有

有

有

魏

有雄天唐有

有

有都鄴

有

博

有唐有

有

有

有

貝 有天雄唐有 有 有 有

衛 有 唐有 有 有 有 有

澶 有 唐有 有 有 有 有

相 有昭德唐有 有彰德 有 有 有

邢 有保義唐有安國 有 有 有 有

洛 有 有 有 有 有 有

磁 有改曰思州 有復曰磁州 有 有 有 有

鎮 有武順唐有成德 有順德 有成德 有

冀 有 唐有 有 有 有 有

深 有 唐有 有 有 有 有

趙 有 唐有 有 有 有 有

易 有 唐有 有 有 有 有

祁 有 唐有 有 有 有 有

定 有義武唐有 有 有 有 有

滄 有橫海唐有 有 有 有 有

景 有 唐有 有 有 有 有廢

德 有 唐有 有 有 有 有

濱 有 有 有 有 有 有世宗置

瀛 有 唐有 契丹 契丹 有

莫 有 唐有 契丹 契丹 有

雄

有世宗置

霸

有世宗置

幽

唐龍

有契丹契丹契丹

涿

唐有契丹契丹契丹

檀

唐有契丹契丹契丹

薊

唐有契丹契丹契丹

順

唐有契丹契丹契丹

營

唐有契丹契丹契丹

平

唐有契丹契丹契丹

蔚

唐有契丹契丹契丹

朔

唐武振

有契丹契丹契丹

雲

唐同大

有契丹契丹契丹

應

唐

有契丹契丹契丹

新

唐

有契丹契丹契丹

媯

唐

有契丹契丹契丹

儒

唐

有契丹契丹契丹

武

唐

有契丹契丹契丹

寰

有明宗置

契丹契丹契丹

忻

唐

有東漢

代

唐門

有東漢

嵐 唐 有 有 有 有 東漢

石 唐 有 有 有 有 東漢

憲 唐 有 有 有 有 東漢

麟 唐 有 有 有 有 東漢

府 唐 有 有 有 有 有 有 有 有 東漢

并 唐 有 有 有 有 有 有 有 有 東漢

汾 唐 有 有 有 有 有 有 有 有 東漢

慈 唐 有 有 有 有 有 有 有 有 東漢

澤 唐 有 有 有 有 有 有 有 有 東漢

濕 唐 有 有 有 有 有 有 有 有 東漢

潞 唐 有 有 有 有 有 有 有 有 東漢

沁 唐 有 有 有 有 有 有 有 有 東漢

遼 唐 有 有 有 有 有 有 有 有 東漢

揚 吳 有 有 有 有 有 有 有 有 東漢

楚 吳 有 有 有 有 有 有 有 有 東漢

泗 吳 有 有 有 有 有 有 有 有 東漢

滁 吳 有 有 有 有 有 有 有 有 東漢

和 吳 有 有 有 有 有 有 有 有 東漢

光 吳 有 有 有 有 有 有 有 有 東漢

黃 吳 有 有 有 有 有 有 有 有 東漢

舒 吳 吳 南唐 南唐 有

蘄 吳 吳 南唐 南唐 有

廬 吳 吳 南唐 南唐 有保義

壽 吳 吳 南唐 南唐 有忠正

海 吳 吳 南唐 南唐 有

泰 吳 吳 南唐 南唐 有

濠 吳 吳 南唐 南唐 有

通 吳 吳 南唐 南唐 有世宗置

潤 吳 吳 南唐 南唐 有

常 吳 吳 南唐 南唐 有

宣 吳寧國 吳 南唐 南唐 南唐

歙 吳 吳 南唐 南唐 南唐

鄂 吳武昌 吳 南唐 南唐 南唐

昇 吳 吳 南唐 南唐 南唐

池 吳 吳 南唐 南唐 南唐

饒 吳 吳 南唐 南唐 南唐

信 吳 吳 南唐 南唐 南唐

江 吳 吳 南唐 南唐 南唐

洪 吳鎮南 吳 南唐 南唐 南唐

撫 吳 吳 南唐 南唐 南唐

袁 吳 吳 南唐 南唐 南唐

吉 吳 吳 南唐 南唐 南唐

虔 有 吳 吳 南唐 南唐 南唐

筠 南唐李煜置 南唐 南唐

建 閩 閩 南唐 南唐 南唐

汀 閩 閩 南唐 南唐 南唐

漳 閩 閩 南唐李煜置 南唐 南唐

泉 閩 閩 南唐留從效 南唐留從效 南唐留從效

福 閩威武 閩 吳 越 吳 越 吳 越

杭 吳 越鎮海 吳 越 吳 越 吳 越 吳 越

越 吳 越鎮東 吳 越 吳 越 吳 越 吳 越

蘇 吳 越 吳 越 吳 越 吳 越 吳 越

湖 吳 越 吳 越 吳 越 吳 越 吳 越宣德

温 吳 越 吳 越 吳 越靜海 吳 越 吳 越

台 吳 越 吳 越 吳 越 吳 越 吳 越

明 吳 越 吳 越 吳 越 吳 越 吳 越

處 吳 越 吳 越 吳 越 吳 越 吳 越

衢 吳 越 吳 越 吳 越 吳 越 吳 越

婺 吳 越 吳 越 吳 越 吳 越 吳 越

睦 吳越 吳越 吳越 吳越 吳越

秀 吳越元瑾置 吳越 吳越

荆 南平荆南 南平 南平 南平 南平

歸 蜀 南平 南平 南平 南平

峽 蜀 南平 南平 南平

益 蜀成都 有後蜀 蜀 蜀

漢 蜀 有後蜀 蜀 蜀

彭 蜀 有後蜀 蜀 蜀

蜀 蜀 有後蜀 蜀 蜀

綿 蜀 有後蜀 蜀 蜀

眉 蜀 有後蜀 蜀 蜀

嘉 蜀 有後蜀 蜀 蜀

劍 蜀 有後蜀 蜀 蜀

梓 蜀劍南東川 有後蜀 蜀 蜀

遂 蜀武信 有後蜀 蜀 蜀

果 蜀 有後蜀 蜀 蜀

閬 蜀 有保寧後蜀 蜀 蜀

普 蜀 有後蜀 蜀 蜀

陵 蜀 有後蜀 蜀 蜀

資 蜀 有後蜀 蜀 蜀

榮 蜀 有後蜀 蜀 蜀

簡 蜀 有後蜀 蜀 蜀

邛 蜀 有後蜀 蜀 蜀

黎 蜀 有後蜀 蜀 蜀

雅 蜀平永 有後蜀 蜀 蜀

維 蜀 有後蜀 蜀 蜀

茂 蜀 有後蜀 蜀 蜀

文 蜀 有後蜀 蜀 蜀

龍 蜀 有後蜀 蜀 蜀

黔 蜀武泰 有後蜀 蜀 蜀

施 蜀 有後蜀 蜀 蜀

夔 蜀鎮江 有後蜀 蜀 蜀

忠 蜀 有後蜀 蜀 蜀

萬 蜀 有後蜀 蜀 蜀

興 蜀 有後蜀 蜀 蜀

利 蜀昭武 有後蜀 蜀 蜀

開 蜀 有後蜀 蜀 蜀

涪 蜀 有後蜀 蜀 蜀

渝 蜀 有後蜀 蜀 蜀

瀘 蜀 有後蜀蜀 蜀 蜀

合 蜀 有後蜀蜀 蜀 蜀

昌 蜀 有後蜀蜀 蜀 蜀

巴 蜀 有後蜀蜀 蜀 蜀

蓬 蜀 有後蜀蜀 蜀 蜀

集 蜀 有後蜀蜀 蜀 蜀

璧 蜀 有後蜀蜀 蜀 蜀

渠 蜀 有後蜀蜀 蜀 蜀

戎 蜀 有後蜀蜀 蜀 蜀

梁 蜀 有後蜀蜀 蜀 蜀

洋 蜀定武 有後蜀蜀 蜀 蜀

潭 楚安武 楚 楚 蜀 周行逢

衡 楚 楚 楚 蜀 周行逢

澧 楚 楚 楚 蜀 周行逢

朗 楚 楚 楚 蜀 周行逢

岳 楚 楚 楚 蜀 周行逢

道 楚 楚 楚 蜀 周行逢

永 楚 楚 楚 蜀 周行逢

邵 楚 楚 楚 蜀 周行逢

全 楚 楚 楚馬希範置 蜀 周行逢

辰

楚

楚

楚

楚

周行逢

融

楚

楚

楚

南漢

南漢

柳

楚

楚

楚

南漢

南漢

連

楚

楚

楚

南漢

南漢

昭

楚

楚

楚

南漢

南漢

宜

楚

楚

楚

南漢

南漢

桂

楚

楚

楚

南漢

南漢

賀

楚

楚

楚

南漢

南漢

梧

楚

楚

楚

南漢

南漢

蒙

楚

楚

楚

南漢

南漢

嚴

楚

楚

楚

南漢

南漢

富

楚

楚

楚

南漢

南漢

柳

楚

楚

楚

南漢

南漢

象

楚

楚

楚

南漢

南漢

容

南漢達寧

南漢

南漢

南漢

南漢

邕

南漢建武

南漢

南漢

南漢

南漢

瑞

南漢

南漢

南漢

南漢

南漢

康

南漢

南漢

南漢

南漢

南漢

封

南漢

南漢

南漢

南漢

南漢

恩

南漢

南漢

南漢

南漢

南漢

春

南漢 南漢 南漢 南漢 南漢 南漢 南漢

新

南漢 南漢 南漢 南漢 南漢 南漢 南漢

高

南漢 南漢 南漢 南漢 南漢 南漢 南漢

竇

南漢 南漢 南漢 南漢 南漢 南漢 南漢

雷

南漢 南漢 南漢 南漢 南漢 南漢 南漢

化

南漢 南漢 南漢 南漢 南漢 南漢 南漢

韶

有西漢 南漢 南漢 南漢 南漢 南漢 南漢

藤

南漢 南漢 南漢 南漢 南漢 南漢 南漢

白

南漢 南漢 南漢 南漢 南漢 南漢 南漢

廉

南漢 南漢 南漢 南漢 南漢 南漢 南漢

欽

南漢 南漢 南漢 南漢 南漢 南漢 南漢

廣

南漢清海 南漢 南漢 南漢 南漢 南漢 南漢

橫

南漢 南漢 南漢 南漢 南漢 南漢 南漢

賓

南漢 南漢 南漢 南漢 南漢 南漢 南漢

潯

南漢 南漢 南漢 南漢 南漢 南漢 南漢

惠

南漢 南漢 南漢 南漢 南漢 南漢 南漢

鬱林

南漢 南漢 南漢 南漢 南漢 南漢 南漢

英

南漢劉龔 南漢 南漢 南漢 南漢 南漢 南漢

雄

南漢劉龔 南漢 南漢 南漢 南漢 南漢 南漢

瓊

南漢 南漢 南漢 南漢 南漢 南漢 南漢

崖 南漢 南漢 南漢 南漢 南漢 南漢

儋 南漢 南漢 南漢 南漢 南漢 南漢

萬安 南漢 南漢 南漢 南漢 南漢 南漢

羅 南漢 南漢 南漢 南漢 南漢 南漢

潘 南漢 南漢 南漢 南漢 南漢 南漢

勤 南漢 南漢 南漢 南漢 南漢 南漢

瀧 南漢 南漢 南漢 南漢 南漢 南漢

辨 南漢 南漢 南漢 南漢 南漢 南漢

汴州唐改曰宣武軍梁以汴州為開封府建為東都後唐
滅梁復為宣武軍晉天福三年升為東京漢周因之

洛陽梁唐晉漢周常以為都唐故為東都梁為西都後唐
為洛京晉為西京漢周因之

雍州唐故上都昭宗遷洛廢為佑國軍梁初改京北府曰

大安佑國軍曰永平唐滅梁復為西京晉廢為晉昌軍漢

改曰永興周因之

曹州故屬宣武軍節度晉開運二年置威信軍漢初軍廢

周廣順二年復置彰信軍

宋州故屬宣武軍節度梁初徙置宣武軍唐滅梁改曰歸

德

陳州故屬忠武軍節度晉開運二年置鎮安軍漢初軍廢

周廣順二年復之

許州唐故曰忠武梁改曰匡國唐滅梁復曰忠武

滑州唐故曰義成以避梁王父諱改曰宣義唐滅梁復其故

襄州唐故曰山南東道唐梁之際改曰忠義軍後以延州為忠義襄州復曰山南東道

鄧州故屬山南東道節度梁破趙匡凝分鄧州置宣化軍唐改曰威勝周改曰武勝

安州梁置宣威軍唐改曰安遠晉罷漢復曰安遠周又罷晉州故屬護國軍節度梁開平四年置定昌軍貞明三年

改曰建寧唐改曰建雄

金州故屬山南東道節度唐末置戎昭軍已而廢之遂入于蜀至晉高祖時又置懷德軍尋罷

陝州唐故曰保義梁改曰鎮國後唐復曰保義

華州唐故曰鎮國梁改曰感化後唐復曰鎮國

同州唐故曰匡國梁改曰忠武後唐復曰匡國

耀州本華原縣唐末屬李茂貞建為耀州置義勝軍梁末帝時茂貞養子溫韜以州降梁梁改耀州為崇州義勝曰靜勝後唐復為耀州改曰順義

延州故屬保大軍節度梁置忠義軍唐改曰彰武

魏州唐故曰大名府置天雄軍五代皆因之後唐建鄴都
晉漢因之至周罷大名府後唐曰興唐晉曰廣晉漢周復
曰大名

澶州故屬天雄軍節度晉天福九年置鎮寧軍

相州故屬天雄軍節度梁末帝分置昭德軍而天雄軍亂
遂入于晉莊宗滅梁復屬天雄晉高祖置彰德軍

邢州故屬昭義軍節度昭義所統澤潞邢洛磁五州唐末
孟方立為昭義軍節度使徙其軍額于邢州而澤潞二州
入于晉方立但有邢洛磁三州故當唐末有兩昭義軍梁
晉之爭或入于梁或入于晉梁以邢洛磁三州為保義軍

莊宗滅梁改曰安國

鎮州故曰成德軍梁初以成音犯廟諱改曰武順唐復曰
成德晉又改曰順德漢復曰成德

應州故屬大同軍節度唐明宗即位以其應州人也乃置
彰國軍新州唐同光元年置威塞軍

府州晉置永安軍漢罷之周復

并州後唐建北都其軍仍曰河東

潞州唐故曰昭義梁末帝時屬梁改曰匡義歲餘唐滅梁
改曰安義晉復曰昭義

廬州周世宗克淮南置保信軍

五代史卷之六十一
五代考三
十九
壽州唐故曰忠正南唐改曰清淮周世宗平淮南復曰忠正

五代之際外屬之州揚州曰淮南宣州曰寧國鄂州曰武昌洪州曰鎮南福州曰武威杭州曰鎮海越州曰鎮東江陵府曰荆南益州梓州曰劔南東西道遂州曰武信興元府曰山南西道洋州曰武定黔州曰黔南潭州曰武安桂州曰靜江容州曰寧遠邕州曰建武廣州曰清海皆唐故號更五代無所易而今因之者也其餘僭偽改置之名不可悉考而不足道其因著于今者略注于譜

濟州周廣順二年置割鄆州之鉅野鄆城兗州之任城單州之金鄉為屬縣而治鉅野

單州唐末以宋州之碭山梁太祖鄉里也為置輝州已而徙治單父後唐滅梁改輝州為單州其屬縣治徙傳記不同今領單父碭山成武魚臺四縣

耀州李茂貞置治華原縣梁初改曰崇州唐同光元年復為耀州

解州漢乾祐元年九月置割河中之聞喜安邑解三縣為屬而治解

威州晉天福四年置割靈州之方渠寧州之木波烏領三鎮為屬而治方渠周廣順二年改曰環州顯德四年廢為

五代置軍六皆寄治於縣隸於州故不別出監者物務之名爾故不載

於地理皇朝軍監始自置屬縣與州府并列矣

乾州李茂貞置治奉先縣

磁州梁改曰惠州唐復曰磁州

景州唐故置弓高周顯德二年廢為定遠軍割其屬安陵

縣屬德州廢弓高縣入東光縣為定遠軍治所

濱州周顯德三年置以其濱海為名初五代之際置推鹽

務於海傍後為贍國軍周因置州割棣州之渤海蒲臺為

屬縣而治渤海

雄州周顯德六年克瓦橋關置治歸義割易州之容城為

屬尋廢

霸州周顯德六年克益津關置治永清割莫州之文安瀛

州之大城為屬

通州本海陵之東境南唐置靜海制置院周世宗克淮南

升為靜海軍後置通州分其地置靜海海門二縣為屬而

治靜海

筠州南唐李景置割洪州之高安上高萬載清江四縣為

屬而治高安

劔州南唐李景置割建州之延平劔浦富沙三縣為屬而

治延平

全州楚王馬希範置以潭州之湘川縣為清湘縣又割灌

陽縣為屬而治清湘

秀州吳越王錢元瓘置割杭州之嘉興縣為屬而治之

雄州南漢劉龔割韶州之保昌置治保昌

英州南漢劉龔割廣州之湏陽置治湏陽

開封府故統六縣梁開平元年割滑州之酸棗長垣鄭州之中牟陽武宋州之襄邑曹州之考城更曰戴邑許州之扶溝隰陵陳州之太康隸焉唐分酸棗中牟襄邑隰陵太康五縣還其故晉升汴州為東京復割五縣隸焉

雍丘晉改曰杞漢復其故長垣唐改曰匡城

黎陽故屬滑州晉割隸衛州

葉襄城故屬許州唐割隸汝州

楚丘故屬單州梁割隸宋州

密州膠西故曰輔唐梁改曰安丘唐復其故晉改曰膠西
渭南故屬京兆周改隸華州

同官故屬京兆府梁割隸同州唐割隸耀州

美原故屬同州李茂貞置鼎州而治之梁改為裕州屬順
義軍節度後不見其廢時唐同光三年割隸耀州

平涼故屬涇州唐末渭州陷吐蕃權於平涼置渭州而縣
廢後唐清泰三年以故平涼之安國耀武兩鎮置平涼縣
屬涇州

臨涇故屬涇州唐末原州陷吐蕃權於臨涇置原州而涇州兼治其民後唐清泰三年割隸原州

鄜州咸寧周廢

稷山故屬河中唐割隸絳州

慈州忤城呂香周廢

大名府大名唐故曰貴鄉後唐改曰廣晉漢改曰大名

滄州長蘆乾符周廢入清池無棣周置保順軍

安陵故屬景州周割隸德州

澶州頓丘晉置德清軍

博州武水周廢入聊城

博野故屬深州周割隸定州

武康故屬湖州梁割隸杭州

福州閩清梁乾化元年王審知於梅溪場置

蘇州吳江梁開平三年錢鏐置

明州望海梁開平三年錢鏐置

處州長松故曰松陽梁改曰長松

潭州龍喜漢乾祐三年馬希範置

天長六合故屬揚州南唐以天長為軍六合為雄州周復故

漢陽故屬鄂州周置漢陽軍

汧州故屬沔州周割隸安州

襄州樂鄉周廢入宜城

鄧州臨湍漢改曰臨瀨菊潭向城周廢

復州竟陵晉改曰景陵

監利故屬復州梁割隸江陵

唐州慈丘周廢

商州乾元漢改曰乾祐割隸京北

洛南故屬華州周割隸商州

隨州唐城梁改曰漢東後唐復舊晉又改漢東漢復舊

雄勝軍本鳳州固鎮周置軍

秦州天水隴城唐末廢後唐復置

成州栗亭後唐置

自唐有方鎮而史官不錄於地理之書以謂方鎮兵戎之

事非職方所掌故也然而後世因習以軍自地而沒其州

名若今永興本節度軍名而今命守臣遂曰知永興軍府事而不言雍州京兆是也又今置軍者徒以虛

名升建為州府之重此不可以不書也州縣凡唐故而廢

於五代若五代所置而見於今者及縣之割隸今因之者

皆宜列以備職方之考其餘嘗置而復廢嘗改割而復舊

者皆不足書山川物俗職方之掌也五代短世無所遷變

故亦不復錄而錄其方鎮軍名以與前史互見之云

五代史記卷第六十

五代史記卷第六十一

吳世家一

宋歐陽脩撰 徐無黨註

嗚呼自唐失其政天下乘時黥髡盜販袞冕戎魏吳暨南
唐姦豪竊攘蜀險而富漢險而貧貧能自彊富者先亡閩
陋荆蹙楚開蠻服剝剝弗堪吳越其尤牢牲視人嶺蠻遭
劉百年之間並起爭雄山川亦絕風氣不通語曰清風興
群陰伏日月出燭火息故真人作而天下同作十國世家
揚行密字化源廬州合肥人也為人長大有力能手舉百
斤唐乾符中江淮群盜起行密以為盜見獲刺史鄭祭竒
其狀貌釋縛縱之後應募為州兵戍朔方遷隊長歲滿戍

還而軍吏惡之復使出戍行密將行過軍吏舍軍吏陽為
好言問行密行何所欲行密奮然曰惟少公頭爾即斬其
首攜之而出因起兵為亂自號八營都知兵馬使刺史郎
幼復弃城走行密遂據廬州中和三年唐即拜行密廬州
刺史淮南節度使高駢為畢師鐸所攻駢表行密行軍司
馬行密率兵數千赴之行至天長師鐸已囚駢召宣州秦
彥入揚州行密不得入屯于蜀岡師鐸率眾數萬出擊行
密行密陽敗弃營走師鐸兵饑乘勝爭入營取軍實行密
反兵擊之師鐸大敗單騎走入城遂殺高駢行密聞駢死
縞軍向城哭三日攻其西門彥及師鐸奔于東塘行密遂
入揚州是時城中倉廩空虛饑民相殺而食其夫婦父子
自相牽就屠賣之屠者剗剔如羊豕行密不能守欲走而
蔡州秦宗權遣其弟宗衡掠地淮南彥及師鐸還自東塘
與宗衡合行密閉城不敢出已而宗衡為偏將孫儒所殺
儒攻高郵破之行密益懼其客袁襲曰吾以新集之眾守
空城而諸將多駢舊人非有厚恩素信力制而心服之也
今儒兵方盛所攻必克此諸將持兩端因彊弱擇向背之
時也海陵鎮使高霸駢之舊將必不為吾用行密乃以軍
令召霸霸率其兵入廣陵行密欲使霸守天長襲曰吾以
疑霸而召之其可復用乎且吾能勝儒無所用霸不幸不

勝天長豈吾有哉不如殺之以并其衆行密因犒軍擒霸
族之得其兵數千已而孫儒殺秦彥畢師鐸并其兵以攻
行密行密欲走海陵襲曰海陵難守而廬州吾舊治也城
廩完實可爲後圖行密乃走廬州久之未知所嚮問襲曰
吾欲卷甲倍道西取洪州可乎襲曰鍾傳新得江西勢未
可圖而秦彥之入廣陵也召池州刺史趙錙委以宣州今
彥且死錙失所恃而守宣州非其本志且其爲人非公敵
此可取也行密乃引兵攻錙戰于曷山大敗之進圍宣州
錙弃城走追及殺之行密遂入宣州龍紀元年唐拜行密
宣州觀察使行密遣田頔安仁義李神福等攻浙西取蘇
常潤州二年取滁和州景福元年取楚州孫儒自逐行密
入廣陵久之亦不能守乃焚其城殺民老疾以餉軍驅其
衆渡江號五十萬以攻行密諸將田頔劉威等遇之輒敗
行密欲走銅官其客戴友規曰儒來氣銳而兵多蓋其鋒
不可當而可以挫其衆不可敵而可久以敝之若避而走
是就擒也劉威亦曰背城堅柵可以不戰疲之行密以爲然
久之儒兵饑又大疫行密悉兵擊之儒敗被擒將死仰觀
見威曰聞公爲此策以敗我使我有將如公者其可敗邪
行密收儒餘兵數千以皂衣蒙甲號黑雲都常以爲親軍
是歲復入揚州唐拜行密淮南節度使乾寧二年加檢校

太傅同中書門下平章事行密以田頔守宣州安仁義守潤州昇州刺史馮弘鐸來附分遣頔等攻掠自淮以南江以東諸州皆下之進攻蘇州擒其刺史成及四年兗州朱瑾奔于行密初瑾為梁所攻求救于晉晉遣李承嗣將勁騎數千助瑾瑾敗因與俱奔行密行密兵皆江淮人淮人輕弱得瑾勁騎而兵益振是歲梁太祖遣葛從周龐師古攻行密壽州行密擊敗梁兵清口殺師古而從周收兵走追至淠河又大敗之五年錢鏐攻蘇州及周本戰于白方湖本敗蘇州復入于越天復元年遣李神福攻越戰臨安大敗之擒其將顧全武以歸二年馮弘鐸叛襲宣州及田頔戰于曷山弘鐸敗將入于海行密自至東塘邀之使人謂弘鐸曰勝敗用兵常事也一戰之衄何苦自弃于海島吾府雖小猶足容君弘鐸感泣行密從十餘騎馳入其軍以弘鐸歸為節度副使以李神福代弘鐸為昇州刺史是歲唐昭宗在岐遣江淮宣諭使李儼拜行密東面諸道行營都統檢校太師中書令封吳王三年以李神福為鄂岳招討使以攻杜洪荆南成汭救洪神福敗之于君山梁兵攻青州王師範來求救遣王茂章救之大敗梁兵殺朱友寧友寧梁太祖子也太祖大怒自將以擊茂章兵號二十萬復為茂章所敗田頔叛襲昇州執李神福妻子歸于宣

州行密召神福以討顧顧遣其將王壇逆之又遺神福書以其妻子招之神福曰吾以一卒從吳王起事今為大將忍背德而顧妻子乎立斬其使以自絕軍士聞之皆感奮行至吉陽磯顧執神福子承鼎以招之神福叱左右射之遂敗壇兵于吉陽行密別遣臺濛擊顧顧敗死初顧及安仁義朱延壽等皆從行密起微賤及江淮甫定思漸休息而三人者皆猛悍難制頗欲除之未有以發天復二年錢鏐為其將許再思等叛而圍之再思召顧攻鏐杭州垂克而行密納鏐賂命顧解兵顧恨之顧嘗計事廣陵行密諸將多就顧求賂而獄吏亦有所求顧怒曰吏欲我下獄邪

歸而遂謀反仁義聞之亦反焚東塘以襲常州常州刺史李遇出戰望見仁義大罵之仁義止其軍曰李遇乃敢辱我如此其必有伏兵遂引軍却而伏兵果發追至夾岡仁義植幟解甲而食遇兵不敢追仁義復入潤州行密遣王茂章李德誠米志誠等圍之吳之軍中推朱瑾善槩志誠善射皆為第一而仁義常以射自負曰志誠之弓十不當瑾槩之一瑾槩之十不當仁義弓之一每與茂章等戰必命中而後發以此吳軍畏之不敢近行密亦欲招降之仁義猶豫未決茂章乘其怠穴地道而入執仁義斬于廣陵延壽者行密夫人朱氏之弟也顧及仁義之將叛也行密

疑之乃陽爲目疾每接延壽使者必錯亂其所見以示之嘗行故觸柱而仆朱夫人扶之良久乃蘇泣曰吾業成而喪其目是天廢我也吾兒子皆不足以任事得延壽付之吾無恨矣夫人喜急召延壽延壽至行密迎之寢門刺殺之出朱夫人以嫁之天祐二年遣劉存攻鄂州焚其城城中兵突圍而出諸將請急擊之存曰擊之復入則城愈固聽其去城可取也是日城破執杜洪斬于廣陵九月梁兵攻破襄州趙匡凝奔于行密十一月行密卒年五十四謚曰武忠子渥立溥僭號追尊行密爲太祖武皇帝陵曰興陵

渥字承天行密長子也行密病出渥爲宣州觀察使右衛指揮使徐溫私謂渥曰今王有疾而出嫡嗣必有姦臣之謀若他日召子非溫使者慎無應命渥涕泣謝溫而去行密病甚命判官周隱作符召渥隱慮渥幼弱不任事勸行密用舊將有威望者代主軍政乃薦大將劉威行密未許溫與嚴可求入問疾行密以隱議告之溫等大驚遽詣隱所計事隱未出而溫見隱作召符猶在案上急取遣之渥見溫使者乃行行密卒渥嗣立召周隱罵曰汝欲賣吾國者復何面目見楊氏乎遂殺之以王茂章爲宣州觀察使渥之入也多輦宣州庫物以歸廣陵茂章惜而不與渥怒

命李簡以兵五千圍之茂章奔于錢塘天祐三年二月劉
存取岳州四月江西鍾傳卒其子匡時代立傳養子延規
怨不得立以兵攻匡時渥遣秦裴率兵攻之九月克洪州
執匡時及其司馬陳象以歸斬象於市赦匡時以秦裴為
江西制置使梁太祖代唐改元開平渥仍稱天祐鄂州劉
存岳州陳知新以舟師伐楚敗于瀏陽楚人執存及知新
以歸楚王馬殷素聞其名皆欲活之存等大罵殷曰昔歲
宣城脫吾刃下今日之敗乃天亡我我肯事汝以求活邪
我豈負楊氏者殷知不可屈乃殺之岳州復入于楚初渥
之入廣陵也留帳下兵三千於宣州以其腹心陳璠范遇
將之既入立惡徐溫典牙兵召璠等為東院馬軍以自衛
而溫與左衛都指揮使張顥皆行密時舊將又有立渥之
功共惡璠等侵其權四年正月渥視事璠等侍側溫顥擁
牙兵入拽璠等下斬之渥不能止由是失政而心憤未能
發溫等益不自安五年五月溫顥共遣盜入寢中殺渥渥
說群盜能反殺溫等者皆為刺史群盜皆諾惟紀祥不從
執渥縊殺之時年二十三謚曰景弟隆演立溥僭號追尊
渥為烈宗景皇帝陵曰紹陵

隆演字鴻源行密第二子也初名瀛又名渭初溫顥之弒
渥也約分其地以臣於梁及渥死顥欲背約自立溫患之

問其客嚴可求可求曰顯雖剛愎而闇於成事此易爲也
明日顯列劔戟府中召諸將議事自大將朱瑾而下皆去
衛從然後入顯問諸將誰當立者諸將莫敢對顯三問可
求前密啓曰方今四境多虞非公主之不可然恐爲之太
速且今外有劉威陶雅李簡李遇皆先王一等人也公雖
自立未知此輩能降心以事公否不若輔立幼主漸以歲
時待其歸心然後可也顯不能對可求因趨出書一教內
袖中率諸將入賀諸將莫知所爲及出教宣之乃渥母史
氏教言楊氏創業艱難而嗣王不幸隆演以次當立告諸
將以無負楊氏而善事之辭旨激切聞者感動顯氣色皆

沮卒無能爲隆演乃得立顯由此與溫有隙諷隆演出溫
潤州可求謂溫曰今捨衛兵而出外郡禍行至矣溫患之
可求因說顯曰公與徐溫同受顧託議者謂公奪其衛兵
是將殺之於外信乎顯曰事已行矣安可止乎可求曰甚
易也明日從顯與諸將造溫可求陽責溫曰古人不忘一
飯之恩况公楊氏三世之將今幼嗣新立多事之時乃求
居外以苟安乎溫亦陽謝曰公等見留不願去也由是不
行行軍副使李承嗣與張顯善覺可求有附溫意諷顯使
客夜刺殺之客刺可求不能中明日可求詣溫謀先殺顯
陰遣鍾章選壯士三十人就衛堂斬顯因以弑渥之罪歸

之溫由是專政隆演備位而已六月撫州危全諷叛攻洪州袁州彭彥章吉州彭玕信州危仔倡皆起兵叛隆演召嚴可求問誰可用者可求薦周本時本方攻蘇州敗歸慙不肯出可求彊起之本曰蘇州之敗非怯也乃上將權輕而下多專命爾若必見任願無用偏裨乃請兵七千戰于象牙潭敗之執全諷彥章而玕奔于楚仔倡奔于錢塘全諷至廣陵諸將議曰昔先王攻趙鍾全諷屢饒給吳軍乃釋不殺初全諷欲舉兵也錢鏐送王茂章于梁道過全諷謂曰聞公欲大舉願見公兵以知濟否全諷陣兵與茂章登城望之茂章曰我素事吳吳兵三等如公此衆可當其下將爾非得益兵十萬不可而全諷卒以此敗八年徐溫領昇州刺史治舟師於金陵宣州李遇自行密時爲大將勲位已高憤溫用事嘗曰徐溫何人吾猶未識而驟至於此溫聞之怒遣柴再用以兵送王壇代遇且召之遇疑不受命再用圍之隆演使客將何蕘諭遇使自歸蕘因說曰公若欲反可殺蕘以示衆若本無心何不隨蕘以出遇自以無反心乃隨蕘出溫諷再用伺其出殺之并族其家九年溫率將吏進隆演位太師中書令吳王溫爲行軍司馬鎮海軍節度使同中書門下平章事陳章攻楚取岳州執其刺史苑玫十年越人攻常州徐溫敗之于無錫梁遣王

茂章攻壽春溫敗之于霍丘十二年封徐溫齊國公兩浙都招討使始鎮潤州留其子知訓爲行軍副使秉政而大事溫遙決之冬濬楊林江水中出火可以燃十三年宿衛將李球馬謙挾隆演登樓取庫兵以誅知訓陣于門橋知訓與戰頻却朱瑾適自外來以一騎前視其陣曰此不足爲也因返顧一麾外兵爭進遂斬球謙而亂兵皆潰十四年徐溫徙治金陵十五年遣王祺會洪袁信三州兵攻虔韶久之不克祺病以劉信代之夏四月副都統朱瑾殺徐知訓瑾自殺潤州徐知誥聞亂率兵入殺唐宣諭使李儼以止亂遂秉政徐氏之專政也隆演幼懦不能自持而知訓尤凌侮之嘗飲酒樓上命優人高貴卿侍酒知訓爲參軍隆演鶉衣髻髻爲蒼鶻知訓嘗使酒罵坐語侵隆演隆演愧耻涕泣而知訓愈辱之左右扶隆演起去知訓殺吏一人乃止吳人皆仄目知訓又與朱瑾有隙瑾已殺知訓携其首馳府中示隆演曰今日爲吳除患矣隆演曰此事非吾敢知遽起入內瑾忿然以首擊柱提劍而出府門已闔踰垣折其足遂自刎死米志誠聞瑾殺知訓被甲率其家兵至天興門問瑾所在聞瑾死乃還徐溫疑志誠助瑾遣使殺之嚴可求懼事不克使人僞從湖南境上來告軍捷召諸將入賀擒志誠斬之劉信克虔州執譚全播以歸

十六年春二月溫率將吏請隆演即天子位不許夏四月
溫奉玉冊寶綬尊隆演即吳王位建宗廟社稷設百官如
天子之制改天祐十六年為武義元年大赦境內追尊行
密孝武王廟號太祖渥景王廟號烈祖拜溫大丞相都督
中外諸軍事封東海郡王以徐知誥為左僕射參知政事
嚴可求為門下侍郎駱知祥為中書侍郎殷文圭沈顏為
翰林學士盧擇為吏部尚書李宗陳璋為左右雄武統軍
柴再用錢鏐為左右龍武統軍王令謀為內樞使江西劉
信征南大將軍鄂州李簡鎮西大將軍撫州李德誠平南
大將軍廬州張宗安西大將軍海州王綰鎮東大將軍文
武以次進位封宗室皆郡公溫之徙鎮金陵也以其養子
知誥守潤州嚴可求嘗謂溫曰二郎君非徐氏子而推賢
下士人望頗歸若不去之恐為後患溫不能用其言及知
誥秉政其語泄知誥出可求於楚州可求懼詣金陵見溫
謀曰唐亡於今十二年而吳猶不敢改天祐可謂不負唐
矣然吳所以征伐四方而建基業者常以復興為辭今聞
河上之戰梁兵屢絀若李氏復興其能屈節乎宜於此時
先建國以自立溫深然之因留可求不遣方謀迫隆演僭
號二年五月隆演卒隆演少年嗣位權在徐氏及建國稱
制非其意常怏怏酣飲稀復進食遂至疾卒年二十四謚

曰宣弟溥立僭號追尊為高祖宣皇帝陵曰肅陵

溥行密第四子也隆演建國封丹陽郡公隆演卒弟廬江公濛次當立而徐氏秉政不欲長君乃立溥七月改昇州大都督府為金陵府拜徐溫金陵尹明年二月改元順義赦境內冬十一月祀天於南郊御天興樓大赦拜徐溫太師嚴可求右僕射三年唐莊宗滅梁遣司農卿盧蘋使于唐嚴可求密條數事授之以行蘋見洛陽莊宗問之蘋次第以對皆如所授四年溥至白沙閱舟師徐溫來見以白沙為迎鑾鎮五年唐遣諫議大夫薛昭文使福州假道江西劉信出勞之謂曰亞次聞有信否昭文曰天子新有河

南未熟公名也信曰漢有韓信吳有劉信君還其語亞次當來較射於淮上也乃酌大卮望牙旗鏡首百步謂昭文曰一發而中願以此卮為壽否則亦以自罰言訖而箭已穿矣六年追爵大丞相徐溫四代祖考立廟於金陵左僕射徐知誥為侍中右僕射嚴可求同平章事是歲莊宗崩五月丁卯詔為同光王輟朝七日七年大丞相徐溫率吳文武上表勸溥即皇帝位溥未許而溫病十月溫卒十一月庚戌溥御文明殿即皇帝位改元曰乾貞大赦境內追尊行密武皇帝渥景皇帝隆演宣皇帝以徐知誥為太尉兼侍中拜溫子知詢輔國大將軍金陵尹治溫舊鎮諸子皆

封王二年正月封東海為廣德王江瀆廣源王淮瀆長源
王馬當上水府寧江王采石中水府定江王金山下水府
鎮江王六月荆南高季興來附封季興秦王九月季興敗
楚師於白田獲其將吏三十四人來獻三年十一月金陵
尹徐知詢來朝知誥誣其有反狀留之不遣以為左統軍
斬其客將周廷望以徐知諤為金陵尹溥加尊號睿聖文
明孝皇帝大赦境內改元大和以徐知誥為中書令二年
冊其子江都王璉為太子三年以徐知誥為金陵尹以其
子景通為司徒及左僕射王令謀右僕射宋齊丘皆平章
事四年封知誥東海王五年建都於金陵六年閏正月金
陵火罷建都廢臨川王濛為歷陽公知誥遣親信王宏以
兵守之拜王令謀司徒宋齊丘司空知誥召景通還金陵
為鎮海軍節度副使以其子景遷為太保平章事與令謀
等執政七年九月溥加尊號曰睿聖文明光孝應天弘道
廣德皇帝大赦改元天祚知誥進位太師天下兵馬大元
帥封齊王二年景遷病以次子景遂為門下侍郎參政事
三年知誥建齊國立宗廟社稷置左右丞相已下以金陵
為西都廣陵為東都冬十月溥遣江夏王麟奉冊禪位於
齊王十二月溥卒於丹陽年三十八謚曰睿昇元六年李
昇遷其子孫於海陵號永寧宮嚴兵守之絕不通人久之

男女自為匹偶吳人多哀憐之顯德三年世宗征淮南下詔撫安楊氏子孫而李昇聞之遣人盡殺其族周先鋒都部署劉重進得其玉硯馬腦椀翡翠瓶以獻楊氏遂絕徐溫字敦美海州朐山人也少以販鹽為盜行密起合肥以隸帳下行密所與起事劉城陶雅之徒號三十六英雄獨溫未嘗有戰功及行密欲殺朱延壽等溫用其客嚴可求謀教行密陽為目疾事成以功遷右衙指揮使始預謀議及行密病平生舊將皆以戰守在外而溫居帳下遂預立渥之功及弑渥又與張顥有隙使鍾章殺之章許諾選壯士三十人椎牛享之刺血為盟溫猶疑章不果夜半使人探其意陽謂曰溫有老母懼事不成不如且止章曰言已出口寧可已乎溫乃安明日鍾章殺顥溫因盡殺紀祥等歸弑渥之罪於顥以其事入白渥母史氏史氏悖而泣曰吾兒年幼禍亂若此得保百口以歸合肥公之惠也隆演立溫遂專政遷昇州刺史治舟師於金陵大將李遇怒溫用事出嫚言溫使柴再用族遇於宣州行密舊將人人皆自疑溫因偽下之恭謹如見行密諸將乃安八年溫遷行軍司馬潤州刺史鎮海軍節度使同平章事十年遣招討使李濤攻越戰于臨安裨將曹筠奔于越濤敗被執溫間遣人語筠曰吾用汝為將汝軍有求吾不能給是吾過

也赦筠妻子不誅厚遇之秋越人攻毗陵温戰于無錫筠感温前言臨陣奔歸遂敗越兵十二年封温齊國公兼兩浙招討使始就鎮潤州以昇潤宣常池黃六州為齊國温城昇州建大都督府十四年徙治之以其子知訓輔隆演於廣陵而大事温遙決之知訓為朱瑾所殺温養子知誥自潤州先入遂得政温雖姦詐多疑而善用將吏江西劉信圍虔州久不克使人說譚全播出降遣使報温温怒曰信以十倍之眾攻一城不下而反用說客降之何以威敵國笞其使者而遣之曰吾以笞信也因命濟師遂破全播人有誣信逗留陰縱全播言信將反者信聞之因自獻捷

至金陵見温温與信博信斂骰子厲聲祝曰劉信欲背吳願為惡彩苟無二心當成渾花温遽止之一擲六子皆赤温慙自以卮酒飲信然終疑之及唐師伐王衍温急召信至廣陵以為左統軍託以內備遂奪其地温客尤見信者惟駱知祥嚴可求可求善籌畫知祥長於財利温嘗以軍旅問可求國用問知祥吳人謂之嚴駱温亦自喜為智詐尤得吳人之心初隨行密破趙鎰諸將皆爭取金帛温獨據餘困作粥以食餓者十六年温請隆演即皇帝位不許又請即吳王位乃許遂建國改元拜温大丞相都督中外諸軍事封東海郡王隆演卒温越次立其弟溥順義十年

溫又請溥即皇帝位溥未許而溫病卒年六十六追封齊王謚曰忠武李昇僭號號溫為義祖

嗚呼盜亦有道信哉行密之書稱行密為人寬仁雅信能得士心其將蔡儔叛於廬州悉毀行密墳墓及儔敗而諸將皆請毀其墓以報之行密嘆曰儔以此為惡吾豈復為邪嘗使從者張洪負劍而侍洪拔劍擊行密不中洪死復用洪所善陳紹負劍不疑又嘗罵其將劉信信忿奔孫儒行密戒左右勿追曰信豈負我者邪其醉而去醒必復來明日果來行密起於盜賊其下皆驍武雄暴而樂為之用者以此也故二世四主垂五十年及渥已下政在徐溫於

此之時天下大亂中國之禍篡弒相尋而徐氏父子區區詐力裴回三主不敢輕取之何也豈其恩威亦有在人者

歟

據吳錄運歷圖九國志皆云行密以唐景福元年再入揚州至晉天福二年為李昇所篡實四十六年而舊唐書舊五代史皆云大順二年

再入揚州至被篡四十七年吳錄徐鉉等撰運歷圖龔穎撰二人皆江南故臣所記宜得實而唐末喪亂中朝文字多差失故今以鉉穎所記為定

五代史記卷第六十一

五代史記卷第六十二

南唐世家二

宋歐陽脩撰 徐無黨註

李昇字正倫徐州人也世本微賤父榮遇唐末之亂不知其所終昇少孤流寓濠泗間楊行密攻濠州得之奇其狀貌養以為子而楊氏諸子不能容行密以乞徐温乃冒姓徐氏名知誥及壯身長七尺廣顙隆準為人温厚有謀為吳樓船軍使以舟兵屯金陵柴再用攻宣州用其兵殺李遇昇以功拜昇州刺史時江淮初定州縣吏多武夫務賦歛為戰守昇獨好學接禮儒者能自勵為勤儉以寬仁為政民稍譽之徐温鎮潤州以昇池等六州為屬温聞昇理

昇州有善政往視之見其府庫充實城壁脩整乃徙治之而遷昇潤州刺史昇初不欲往屢求宣州溫不與既而徐知訓為朱瑾所殺溫居金陵未及聞昇居潤州近廣陵得先聞即日以州兵渡江定亂遂得政昇事徐溫甚孝謹溫嘗罵其諸子不如昇諸子頗不能容而知訓尤甚嘗召昇飲酒伏劍士欲害之行酒吏刁彥能覺之酒至昇以手瓜搯之昇悟起走乃免後昇自潤州入覲知訓與飲於山光寺又欲害之徐知諫以其謀告昇昇起趨去知訓以劍授刁彥能使追殺之及於中途而還給以不及由是得免後昇貴以彥能為撫州節度使知訓之用事也嘗凌弱楊氏

而驕侮諸將遂以見殺及昇秉政欲收人心乃寬刑法推恩信起延賓亭以待四方之士引宋齊丘駱知祥王令謀等為謀客士有羈旅於吳者皆齒用之嘗陰使人察視民間有婚喪匱乏者往往賙給之盛暑未嘗張蓋操扇左右進蓋必却之曰士衆尚多暴露我何用此以故溫雖遙秉大政而吳人頗已歸昇武義元年拜左僕射參知政事溫行軍司馬徐玠數勸溫以己子代昇溫遣子知詢入廣陵謀代昇秉政會溫病卒知詢奔還金陵玠反為昇謀誣知詢以罪斬其客將周廷望以知詢為右統軍楊溥僭號拜昇太尉中書令大和三年出鎮金陵如溫之制留其子景

五代史卷之二十一
唐書卷之二十一
通爲司徒同平章事以王令謀宋齊丘爲左右僕射同平
章事四年封昇東海郡王昇照鑑見白髮顧其吏周宗嘆
曰功業已就而吾老矣柰何宗知其意馳詣廣陵見宋齊
丘謀禪代齊丘以爲未可請斬宗以謝吳人昇黜宗爲池
州刺史吳臨江王濛者怨徐氏捨已而立溥心嘗不平及
昇將謀篡國先廢濛爲歷陽公使吏以兵守之濛殺守者
奔廬州節度使周本本吳舊將也聞濛至欲納之爲其子
祚所止本曰此吾故主家郎君也何忍拒之遽自出迎濛
祚閉門遮本不得出縛濛送金陵見殺五年昇封齊王已
而閩越諸國皆遣使勸進昇謂人望已歸天祚三年建齊

國置宗廟社稷以宋齊丘徐玠爲左右丞相十月溥遣攝
太尉楊璘傳位於昇國號齊改元昇元昇以冊尊溥曰受
禪老臣知誥謹上册皇帝爲高尚思玄弘古讓皇帝遣尊
徐溫爲忠武皇帝封子景爲吳王封徐氏子知證江王知
諤饒王周本與諸將至金陵勸進歸而嘆曰吾不能誅篡
國者以報楊氏今老矣豈能事二姓乎憤惋而死二年四
月遷楊溥於潤州丹陽宮以王輿爲浙西節度使馬思讓
爲丹陽宮使以嚴兵守之徐氏諸子請昇復姓昇謙抑不
敢忘徐氏恩下其議百官百官皆請然後復姓李氏改名
曰昇自言唐憲宗子建王恪生超超生志爲徐州判司志

生榮乃自以為建王四世孫改國號曰唐立唐高祖太宗廟追尊四代祖恪為孝靜皇帝廟號定宗曾祖超為孝平皇帝廟號成宗祖志孝安皇帝廟號惠宗考榮孝德皇帝廟號慶宗奉徐溫為義父徐氏子孫皆封王公女封郡縣主以門下侍郎張居誅中書侍郎李建勳右僕射張延翰同平章事十一月以步騎八萬講武於銅鞮楊溥卒於丹陽宮溥子璉為吳太子時昇以女妻之及昇篡國封其女永興公主女聞人呼公主必悲咽流涕而辭宮中皆憐之溥卒以璉為康化軍節度使已而以疾卒三年四月昇郊祀昊天上帝於圓丘禮畢群臣請上尊號昇曰尊號非古

也不許州縣言民孝悌五代同居者七家皆表門閭復其繇役其尤盛者江州陳氏宗族七百口每食設廣席長幼以次坐而共食有畜犬百餘共一牢食一犬不至諸犬為之不食四年六月晉安州節度使李金全叛送款于昇昇遣鄂州屯營使李承裕迎之承裕與晉將馬全節安審暉戰安陸南三戰皆敗承裕與裨將段處恭皆死都監杜光鄴及其兵五百人被執送于京師高祖厚賜之遣還昇致書高祖復送光鄴等請以敗軍行法高祖又遣之昇以甲士臨淮拒之乃止六年吳越國火焚其宮室府庫甲兵皆盡群臣請乘其弊攻之昇不許遣使弔問厚賙其乏錢氏

自吳時素為敵國昇見天下亂久常厭用兵及將篡國先與錢氏約和歸其所執將士錢氏亦歸吳敗將遂通好不絕昇客馮延巳好論兵大言嘗謂昇曰田舍翁安能成大事而昇志在守吳舊地而已無復經營之略也然吳人亦賴以休息七年昇卒年五十六謚曰光文肅武孝高皇帝廟號烈祖陵曰永陵子景立

景初名景通昇長子也既立又改名璟徐溫死昇專政以為兵部尚書參知政事明年昇鎮金陵留景為司徒同平章事與宋齊丘王令謀居廣陵輔楊溥昇將篡國召景歸金陵為副都統昇立封齊王昇卒嗣立改元保大尊母宋

氏為皇太后妃鍾氏為皇后封弟壽王景遂為燕王宣城王景達為鄂王景邁前未王為保寧王秋改封景遂齊王諸道兵馬元帥太尉中書令景達為燕王副元帥盟於昇樞前約兄弟世世繼立封其子冀南昌王江都尹冬十月破虔州妖賊張遇賢遇賢循州羅縣小吏也初有神降羅縣民家與人言禍福輒中遇賢禱之神曰遇賢是羅漢可留事我是時南海劉龔死子玠初立嶺南盜賊起群盜千餘人未有所統問神當為主者神言遇賢遂共推為帥遇賢自號中天八國王改元永樂置官屬群賊盜皆絳衣攻剽嶺外問神所嚮神曰當過嶺取虔州遂襲南康節度賈

浩不能禦遇賢據白雲洞造宮室有衆十餘萬連陷諸縣
景遣洪州營屯虞候嚴思通事舍人邊鎬率兵攻之遇賢
問神神不復語群盜皆懼遂執遇賢以降景以馮延巳常
夢錫爲翰林學士馮延魯爲中書舍人陳覺爲樞密使魏
岑查文徽爲副使夢錫直宣政殿專掌密命而延巳等皆
以邪佞用事吳人謂之五鬼夢錫屢言五人者不可用景
不納十二月景下令中外庶政委齊王景遂叅決惟陳覺
查文徽得奏事群臣非召見者皆不得入給事中蕭儼上
疏切諫不報侍衛軍都虞候賈宗詣閣求見景曰臣事先
朝三十年見先帝所以成功業者皆用衆賢之謀故延接

踈遠未嘗壅隔然下情猶時有不達者今陛下新即位所
信用者何人柰何頃與臣下隔絕臣老即死恐無復一見
顏色因泣下嗚咽景爲之動容引與坐賜食而慰之遂寢
所下令初宋齊丘爲昇謀篡楊氏最有力及事成乃陽入
九華山昇屢召之乃出昇僭號未幾齊丘以病罷相出爲
洪州節度使景立復召爲相而陳覺魏岑等皆爲齊丘所
引用而岑與覺有隙譖覺於景左遷少府監齊丘亦罷相
爲浙西節度使齊丘不得意願復歸九華山賜號九華先
生封青陽公食青陽一縣二年二月閩人連重遇朱文進
弒其君王延義文進自立是時延義弟延政亦自立於建

五代史卷之二十三 南唐世家二 六
州國號殷王氏兄弟連兵累年閩大亂景因其亂遣查文
徽及待詔臧循發兵攻建州延政聞唐且攻之遣人給福
州曰唐兵助我討賊矣福州信之共殺文進等以降延政
遣其從子繼昌守福州文徽軍屯建陽福州將李仁達殺
王繼昌自稱留後泉州將留從効亦殺其刺史黃紹頗皆
送款於文徽四年八月文徽乘勝克建汀泉漳四州景分
延平劍浦富沙三縣置劍州遷王延政之族于金陵以延
政為饒州節度使李仁達為福州節度使從効為清源軍
節度使景遂欲罷兵而查文徽陳覺等皆言仁達等餘孽
猶在不若乘勝盡取之陳覺自言可不用尺兵致仁達等

景以覺為宣諭使召仁達朝金陵仁達不從覺慙還至建
州矯命發汀建信撫州兵攻仁達時魏岑安撫漳泉聞覺
起兵亦擅發兵會覺景大怒馮延巳等為言兵業行不可
止乃以王崇文為招討使王建封為副使益兵以會之以
延魯魏岑陳覺皆為監軍使仁達送款於吳越吳越以兵
三萬應仁達覺等爭功進退不相應延魯與吳越兵先戰
大敗而走諸軍皆潰歸景怒遣使者鎖覺延魯至金陵而
馮延巳方為宰相宋齊丘復自九華召為太傅為稍解之
乃流覺蘄州延魯舒州韓熙載上書切諫請誅覺等齊丘
惡之貶熙載和州司馬是歲契丹陷京師中國無主而景

方以覺等疲兵東南不暇北顧御史中丞江文蔚劾奏宰相馮延巳諫議大夫魏岑亂政與覺等同罪而不見貶黜言甚切直景大怒自咎其䟽貶文蔚江州司士叅軍亦罷延巳為少傅岑為太子洗馬五年以景遂為太弟景達為元帥封齊王南昌王冀為副元帥封燕王契丹遣使來聘以兵部尚書賈潭報聘六年漢李守貞反河中遣其客將朱元來求援景以潤州節度使李金全為北面行營招撫使兵攻沐陽聞守貞已敗乃還是時漢隱帝少中國衰弱淮北群盜多送款於景景遣皇甫暉出海泗諸州招納之八年福州詐言吳越戍兵亂殺李仁達而遯遣人請建州

節度使查文徽文徽與劔州刺史陳誨下舟閩江趨應之福州以兵出迎誨曰閩人多詐難信宜駐江岸徐圖之文徽曰久則生變乘其未定函取之留誨屯江口進至西門伏兵發文徽被擒誨與越人戰大敗之獲其將馬先進景送先進還越越亦歸景文徽是歲楚王馬希廣為其弟希萼所弒希萼自立九年秋楚人囚希萼於衡山立其弟希崇附于景楚國大亂景遣信州刺史邊鎬攻楚破潭州盡遷馬氏之族于金陵景以希萼為洪州節度使希崇舒州節度使以邊鎬為湖南節度使十年分洪州高安清江萬載上高四縣置筠州以馮延巳孫忌為左右僕射同平章

事廣州劉晟乘楚之亂取桂管景遣將軍張巒出兵爭之不克楚地新定其府庫空虛宰相馮延巳以克楚為功不欲取費於國乃重斂其民以給軍楚人皆怨而叛其將劉言攻邊鎬鎬不守能遜歸十一年金陵大火踰月十二年大饑民多疫死十三年十一月周師南征詔曰蠢爾淮甸敢拒大邦盜據一方僭稱偽號晉漢之代寰海未寧而乃招納叛亡朋助兇逆金全之據安陸守貞之叛河中大起師徒來為應援迫奪閩越塗炭湘潭至於應接慕容憑陵徐部沐陽之後曲直可知勾誘契丹入為邊患結連并壘實我世讎罪惡難名人神共憤乃拜李穀為行營都部署

攻自壽州始是時宋齊丘為洪州節度使景召齊丘還金陵以劉彥貞為神武統軍劉仁贍為清淮軍節度使以距周師李穀曰吾無水戰之具而使淮兵斷正陽浮橋則我背腹受敵乃焚其芻糧退屯正陽是時世宗親征行至圍鎮聞穀退軍曰吾軍却唐兵必追之遣李重進急趨正陽曰唐兵且至宜急擊之劉彥貞等聞穀退軍果以為怯急追之比及正陽而重進先至軍未及食而戰彥貞等遂敗彥貞之兵施利刃於拒馬維以鐵索又刻木為獸號捷馬牌以皮囊布鐵疾藜于地周兵見而知其怯一鼓敗之世宗營于淝水之陽徙浮橋于下蔡景遣林仁肇等爭之不

得而周師取滁州景懼遣泗州牙將王知朗至徐州稱唐
皇帝奉書願効貢賦陳兄事之禮世宗不答景東都副留
守馮延魯光州刺史張紹舒州刺史周祚泰州刺史方訥
皆弃城走延魯削髮為僧為周兵所獲蘄州裨將李福殺
其刺史王承雋降周景益懼始改名景以避周廟諱遣其
翰林學士鍾謨文理院學士李德明奉表稱臣獻犒軍牛
五百頭酒二千石金銀羅綺數千請割壽濠泗楚光海六
州以求罷兵世宗不報分兵襲下楊泰景遣人懷蠟丸書
走契丹求救為邊將所執光州刺史張承翰降周十四年
三月景又遣司空孫晟禮部尚書王宗質奉表辭益卑服

世宗猶不答前遣鍾謨等并晟宗質皆留行在而謨等請
歸取景表盡獻江北地世宗許之遣宗質德明等還始賜
景書曰自有唐失御天步艱六紀于茲瓜分鼎峙自為
聲教各擅蒸黎交結四夷憑陵上國華風不競否運所鍾
凡百有心孰不興憤朕擅一百州之富庶握三十萬之甲
兵農戰交脩士卒樂用苟不能恢復內地申畫邊疆便議
班旋真同戲劇至於削去尊稱願輸臣節孫權事魏蕭管
奉周古也雖然今則不取但存帝號何爽歲寒儻堅事大
之心必不迫人於險德明等還盛稱世宗英武景不悅宋
齊丘陳覺等皆以割地無益而德明賣國以圖利景怒斬

德明遣元帥齊王景達與陳覺邊鎬許文鎮率兵趣壽春
景達將朱元等復得舒蘄泰三州夏大雨周師在揚滁和
者皆却諸將請要其險隘擊之宋齊丘曰擊之怨深不如
縱之以爲德誠諸將閉壁無得要戰故周師皆集於壽州
世宗屯於渦口欲再幸揚州宰相范質以師老泣諫乃班
師以李重進攻廬州向訓守揚州訓請弃揚州併力以攻
壽春乃封府庫付主者遣景舊將按巡城中秋毫不犯而
去淮人大悅皆負糗糧以送周師十五年景達遣朱元等
屯紫金山築甬道以餉壽州二月世宗復南征徙下蔡浮
橋于渦口爲鎮淮軍築二城以夾淮周師連破紫金山諸寨

景達雖爲元帥而兵事皆決於陳覺覺與朱元素有隙以
元素守貞客反覆難信景遣大將楊守忠代元且召之元
憤怒叛降于周諸軍皆潰許文鎮邊鎬皆被執景達以舟
兵奔還金陵劉仁瞻病且死其副使孫羽等以壽州降于
周世宗班師景遣人焚揚州驅其士庶而去冬十月世宗
復南征遂圍濠州濠州刺史郭廷謂告于周曰臣不能守
一州以抗王師然願請命于唐而後降世宗謂之緩攻廷
謂遣人請命于景景許其降乃降又取泗州周師步騎數
萬水陸齊進軍士作檀耒之歌聲聞數十里十二月屯于
楚州之北門交泰元年正月大赦改元周師攻楚州守將

張彥卿鄭昭業城守甚堅攻四十日不可破世宗親督兵以洞屋穴城而焚之城壞彥卿昭業戰死周兵怒甚殺戮殆盡周師復取海泰揚州世宗幸迎鑾以臨大江景知不能支而耻自屈身去其名號乃遣陳覺奉表請傳位與其世子而聽命初周師南征無水戰之具已而屢敗景兵獲水戰卒乃造戰艦數百艘使降卒教之水戰命王環將以下淮景之水軍多敗長淮之舟皆為周師所得又造齊雲舡數百艘世宗至楚州北神堰齊雲舟大不能過乃開老鵲河以通之遂至大江景初自恃水戰以周兵非敵且未能至江及覺奉使見舟師列于江次甚盛以為自天而下

乃請曰臣願還國取景表盡獻江北諸州如約世宗許之始賜景書曰皇帝恭問江南國主勞其良苦而已是時楊泰滁和壽濠泗楚光海等州已為周得業遂獻廬舒蘄黃畫江以為界五月景下令去帝號稱國主奉周正朔時顯德五年也初孫晟使于周留不遣而世宗問晟江南虛實不對世宗怒殺晟周已罷兵景乃贈劉仁贍太師追封晟魯國公世宗遣鍾謨馮延魯歸國景復遣謨等朝京師手自書表稱天地父母之恩不可報又請降詔書同藩鎮遣謨面陳願傳位世子世宗遣謨等還國優詔以勞安之景以謨為禮部侍郎延魯戶部侍郎景為太子時延魯等皆

出入東宮禮部尚書常夢錫自昇世屢言不可使延魯等
近太子及景立延魯等用事夢錫每排斥之景既割地稱
臣有語及朝廷為大朝者夢錫大咲曰君等嘗欲致君如
堯舜今日自為小朝邪鍾謨素善李德明既歸而聞德明
由宋齊丘等見殺欲報其寃未能發陳覺齊丘黨也與景
相嚴續素有隙覺常奉使周還言世宗以江南不即聽命
者嚴續之謀勸景誅續以謝罪景疑之謨因請使于周驗
其事景已割地稱臣乃遣謨入朝謝罪言不即割地者非
續謀願赦之世宗大驚曰續能為謀是忠其主也朕豈殺
忠臣乎謨還言覺姦詐景怒流覺饒州殺之宋齊丘坐覺

黨與放還青陽賜死以大弟景遂為洪州節度使燕王冀
為太子景困於用兵鍾謨請鑄大錢以一當十文曰永通
泉貨謨嘗得罪而大錢廢韓熙載又鑄鐵錢以一當二九
月太子冀卒次子從嘉封吳王居東宮鍾謨言從嘉輕肆
請立紀國公從善景怒貶謨國子司業立從嘉為太子世
宗使人謂景曰吾與江南大義已定然慮後世不能容汝
可及吾世修城隍治要害為子孫計景因營緝諸城謀遷
其都于洪州群臣皆不欲遷惟樞密使唐鑑贊之乃升洪
州為南昌建南都建隆二年留太子從嘉監國景遷于南
都而洪州迫隘宮府營廨皆不能容群臣日夕思歸景悔

怒不已唐鎬慙懼發疾卒六月景卒年六十四從嘉嗣立以喪歸金陵遣使入朝願復景帝號太祖皇帝許之乃謚曰明道崇德文宣孝皇帝廟號元宗陵曰順陵

煜字重光初名從嘉景第六子也煜為人仁孝善屬文工書畫而豐額駢齒一日重瞳子自太子冀已上五子皆早亡煜以次封吳王建隆二年景遷南都立煜為太子留監國景卒煜嗣立於金陵母鍾氏父名泰章煜尊母曰聖尊后立妃周氏為國后封弟從善韓王從益鄭王從謙宜春王從度昭平郡公從信文陽郡公大赦境內遣中書侍郎馮延魯修貢于朝廷令諸司四品以下無職事者日二負

待制於內殿五年泉州留從効卒景之稱臣於周也從効亦奉表貢獻于京師世宗以景故不納從効聞景遷洪州懼以為襲已遣其子紹基納貢于金陵而從効病卒泉人因并送其族于金陵推立副使張漢思漢思老不任事州人陳洪進逐之自稱留後煜即以洪進為節度使乾德二年始用鐵錢民間多藏匿舊錢舊錢益少商賈多以十鐵錢易一銅錢出境官不可禁煜因下令以一當十拜韓熙載中書侍郎勤政殿學士封長子仲遇清源公次子仲儀宣城公五年命兩省侍郎給事中中書舍人集賢勤政殿學士分夕於光政殿宿直煜引與談論煜嘗以熙載盡忠

能直言欲用為相而熙載後房妓妾數十人多出外舍私侍賓客煜以此難之左授熙載右庶子分司南都熙載盡斥諸妓單車上道煜喜留之復其位已而諸妓稍稍復還煜曰吾無如之何矣是歲熙載卒煜嘆曰吾終不得熙載為相也欲以平章事贈之問前世有此比否群臣對曰昔劉穆之贈開府儀同三司遂贈熙載平章事熙載北海將家子也初與李穀相善明宗時熙載南奔吳穀送至正陽酒酣臨訣熙載謂穀曰江左用吾為相當長驅以定中原穀曰中國用吾為相取江南如探囊中物爾及周師之征淮也命穀為將以取淮南而熙載不能有所為也開寶四

年煜遣其弟韓王從善朝京師遂留不遣煜手書求從善還國太祖皇帝不許煜嘗怏怏以國蹙為憂日與臣下酣宴愁思悲歌不已五年煜下令貶損制度下書稱教改中書門下省為左右內史府尚書省為司會府御史臺為司憲府翰林為文館樞密院為光政院諸王皆為國公以尊朝廷煜性驕侈好聲色又喜浮圖高談不恤政事六年內史舍人潘佑上書極諫煜收下獄佑自縊死七年太祖皇帝遣使召煜赴闕煜稱疾不行王師南征煜遣徐鉉周惟簡等奉表朝廷求緩師不答八年十二月王師克金陵九年煜俘至京師太祖赦之封煜遠命侯拜左千牛衛將軍

其後事具國史子世家江南其故老多能言李氏時事云
太祖皇帝之出師南征也煜遣其臣徐鉉朝于京師鉉居
江南以名臣自負其來也欲以口舌馳說存其國其日夜
計謀思慮言語應對之際詳矣及其將見也大臣亦先入
請言鉉博學有材辨宜有以待之太祖笑曰弟去非爾所
知也明日鉉朝于廷仰而言曰李煜無罪陛下師出無名
太祖徐召之升使畢其說鉉曰煜以小事大如子事父未
有過失柰何見伐其說累數百言太祖曰爾謂父子者為
兩家可乎鉉無以對而退嗚呼大哉何其言之簡也蓋王
者之興天下必歸于一統其可來者來之不可者伐之僭

偽假竊期於掃蕩一平而後已予讀周世宗征淮詔恠其

區區攬摭前事務較曲直以為辭何其小也然世宗之英

武有足喜者豈為其辭者之過歟據湯挽所撰江南錄云景以保大十五年正月改元交泰

是歲盡獻淮南十四州畫江為界保大十五年乃周顯德四年也按五代舊史及世宗實錄顯德四年十月壬申世宗方復南征五年正月丙午始克楚州二月己亥景始盡獻淮南諸州畫江為界當是保大十六年也悅等南唐故臣記其目見之事何其差繆而九國志紀年通譜之類但以挽書為正不復參較遂皆差一年至於景滅閩國是保大四年江南錄書於三年亦差一年已見閩世家注或疑景立踰年而改元則滅閩國當為三年周取淮南當為十五年不差但江南錄誤於景立之年改元保大所以常差一年也今知不然者以諸書參較閩人殺王延義當晉開運元年周師始伐南唐當顯德二年據景以初立之年即改元則開運元年為保大二年顯德二年為保大十三年今江南錄書延義被殺於二年周師始伐於十三年則是景立之年改元不誤而挽等書滅王氏割淮南自各差二年尔昇自晉天福二年建國至皇朝開寶八年國滅凡三十九年

五代史記卷第六十二

五代史記卷第六十三

宋歐陽脩撰 徐無黨註

王建字光圖許州舞陽人也為人隆眉廣額狀兒偉然少無賴以屠牛盜驢販私鹽為事里人謂之賊王八後為忠武軍卒稍遷隊將黃巢陷長安僖宗在蜀忠武軍將鹿晏弘以兵八千屬楊復光討賊巢敗走復光以其兵為八都都將千人建與晏弘皆為一都頭復光死晏弘率八都西迎僖宗于蜀所過剽略行至興元逐節度使牛勣自稱留後僖宗即以晏弘為節度使晏弘以建等八都頭皆領屬州刺史已而晏弘擁眾東歸陷陳許建與晉暉韓建張造

李師泰等各率一都西奔于蜀僖宗得之大喜號隨駕五
都以屬十軍觀軍容使田令孜令孜以建等為養子僖宗還
長安使建與晉暉等將神策軍宿衛光啓元年河中王重
榮與令孜爭鹽池重榮召晉兵犯京師僖宗幸鳳翔二年
三月移幸興元以建為清道使使負玉璽以從行至當塗
驛李昌符焚棧道棧道幾斷建控僖宗馬冒煙焰中過宿
坂下僖宗枕建膝寢既覺涕泣解御衣賜之僖宗已至興
元令孜以謂天子播越由已致之懼且得罪西川節度使
陳敬瑄令孜同母弟也令孜因求為西川監軍揚復恭代
為軍容使復恭出建為璧州刺史建乃招集亡命及溪洞

洞夷落有衆八千以攻閬州執其刺史楊行遷又攻利州
利州刺史王珙棄城走敬瑄患之以問令孜令孜曰王八
吾兒也以一介召之可置麾下乃使人招建東川顧彥朗
與建有舊建聞令孜召已大喜因至梓州謂彥朗曰十軍
阿父召我我欲至成都見陳公以求一鎮即以其家屬託
彥朗選精兵二千馳之成都行至鹿頭關敬瑄悔召建使
人止之建大怒擊破鹿頭關取漢州彥朗聞之出兵助建
軍于學射敬瑄遣將句惟立逆建建擊敗之遂攻彭州敬
瑄遣眉州刺史山行章將兵五萬屯新繁建又擊敗之虜
獲萬餘人橫尸四十里敬瑄發兵七萬益行章與建相持

濛陽新都百餘日昭宗遣左諫議大夫李洵為兩川宣諭和協使詔彥朗等罷兵彥朗請以大臣鎮蜀因為建求旌節文德元年六月以宰相常昭度為西川節度使分邛蜀黎雅為永平軍拜建節度使敬瑄不受代昭宗即命昭度將彥朗等兵討之昭宗以建為招討牙內都指揮使久之不克建為昭度曰公以數萬之衆困兩川之人而師久無功柰何且唐室多故東方諸鎮兵接都畿公當歸相天子靜中原以固根本此蠻夷之國不足以留公昭度遲疑未決建遣軍士擒昭度親吏於軍門鬻而食之建入白曰軍士饑湏此為食爾昭度大恐即留符節與建而東昭度已

去建即以兵扼劔門兩川由是阻絕山行章屯廣都建擊敗之行章走眉州以州降建引兵攻成都而資簡戎茂喜邛諸州皆殺刺史降建建攻成都甚急田令孜登城呼建曰老夫與公相厚何嫌而至此建曰軍容父子之恩心何可忘然兵討不受代者天子命也令孜夜入建軍以節度觀察牌印授建明日敬瑄開門迎建建將入城以張勅為都虞候戒其軍士曰吾以張勅為虞候矣汝等無犯其令幸勅執而見我我尚活汝使其殺而後白吾亦不能詰也建入城軍士剽略勅殺百人而後止建遷敬瑄于雅州使人殺之復以令孜為監軍既而亦殺之天順二年十月唐

以建爲檢校司徒成都尹劍南西川節度副大使知節度
事管内觀察處置雲南八國招撫等使東川顧彥朗卒其
弟彥暉立唐遣宦者宗道弼賜彥暉東川旌節絳州刺史
常厚執道弼以攻梓州建遣李簡王宗滌等討厚自彥朗
死建欲圖并東川而未有以發及李簡等討厚戒曰兵已
破厚彥暉必出犒師即與俱來無煩吾再舉也簡等擊厚
敗之鍾陽厚走絳州以唐旌節還道弼而出之彥暉已得
節辭疾不出犒軍乾寧二年建遣王宗滌攻之十二月宗
滌敗彥暉于楸林斬其將羅璋遂圍梓州三年五月昭宗
遣宦者袁易簡詔建罷兵建收兵還成都黔南節度使王

肇以其地降于建四年宗滌復攻東川別遣王宗侃宗阮
等出峽取渝瀘州五月建自將攻東川昭宗遣諫議大夫
李洵判官韋莊宣諭兩川詔建罷兵建不奉詔乃責授建
南州刺史以郊王爲鳳翔節度使徙李茂貞代建爲西川
節度使茂貞拒命乃復建官爵冬十月建攻破梓州彥暉
自殺彥暉將顧彥瑤顧城已危謂諸將吏曰事公當生死
以之指其所佩賓鐵劍曰事急而有叛者當齒此劍及城
將破彥瑤與彥暉召集將吏飲酒遂與之俱死建以王宗
滌爲東川留後唐即以宗滌爲節度使於是并有兩川之
地是時鳳翔李茂貞兼據梁洋秦隴數以兵侵建天復元

年梁太祖兵誅宦者韓全誨等劫天子幸鳳翔梁兵圍之
茂貞閉城距守經年力窘求與梁和建聞遣人聘茂貞許
以出兵為援勸其堅辭勿和遣王宗滌將兵五萬聲言迎
駕以攻興元執其節度使李繼業而武定節度使拓拔思
敬遂以其地降于建於是并有山南西道是時荆南成汭
死襄州趙匡凝遣其弟匡明襲據之建乘其間攻下夔施
忠萬四州三年八月唐封建蜀王四年唐遷都洛陽改元
天祐建與唐隔絕而不知故仍稱天復天復六年又取歸
州於是并有三峽七年梁滅唐遣使者諭建建拒而不納
建因馳檄四方會兵討梁四方知其非誠實皆不應是歲

正月巨人見青城山六月鳳凰見萬歲縣黃龍見嘉陽江
而諸州皆言甘露白鹿白雀龜龍之瑞秋九月己亥建乃
即皇帝位封其諸子為王以王宗吉為中書令常莊為左
散騎常侍判中書門下事唐襲為樞密使鄭騫為御史中
丞張格王鐠為翰林學士周博雅為成都尹蜀恃險而富
當唐之末人士多欲依建以避亂建雖起盜賊而為人多
智詐善待士故其僭號所用皆唐名臣世族莊見素之孫
格濟之子也建謂其左右曰吾為神策軍將時宿衛禁中
見天子夜召學士出入無間恩禮親厚如寮友非將相可
比也故建待格等恩禮尤異其餘宋玘等百餘人並見信

用武成元年正月祀天南郊大赦改元以王宗佶為太師
宗佶本姓甘氏建為忠武軍卒時掠得之養以為子後以
軍功累遷武信軍節度使後建所生子元懿等稍長宗佶
以養子心不自安與鄭騫等謀求為大司馬摠六軍開元
帥府凡軍事便宜行而後聞建以宗佶創業功多優容之
唐襲本以舞童見幸於建宗佶尤易之後為樞密使猶名
呼襲襲雖內恨而外奉宗佶愈謹建聞之怒曰宗佶名呼
我樞密使是將反邪宗佶求大司馬章三上建以問襲襲
因激怒建曰宗佶功臣其威望可以服人心陛下宜即與
之建心益疑宗佶入奏事自請不已建叱衛士撲殺之并

賜騫死六月以遂王宗懿為皇太子建加尊號英武睿聖
皇帝七月駙虞見武定二年頒永昌曆廣都嘉禾合穗三
年八月有龍五十見洵陽水中十月麟見郿州十二月大
赦改明年為永平元年岐王李茂貞自為梁所圍而山南
入于蜀地狹勢孤遂與建和以其子娶建女因求山南故
地建怒不與以王宗佶為北路都統宗佑宗賀唐襲為三
面招討使以攻岐戰于青泥宗佶敗績退保西縣為茂貞
兵所圍建自將擊之岐兵敗解去建至興元而還加尊號
曰英武睿聖光孝皇帝二年又加號曰英武睿聖神功文
德光孝皇帝初田令孜之為監軍也盜唐傳國璽至于蜀

而埋之二月尚食使歐陽柔治令攷故第穿地而得之以
獻五月梁遣光祿卿盧玘來聘推建為兄其印文曰大梁
入蜀之印宰相張格曰唐故事奉使四夷其印文曰大唐
入某國之印今梁以兄事陛下柰何卑我如夷狄建怒欲
殺梁使者格曰此梁有司之過爾不可以絕兩國之權已
而梁太祖崩建遣將作監李紘吊之遂刻其印文曰大蜀
入梁之印劔州木連理六月麟見文州十二月黃龍見富
義江三年正月麟見永泰五月騶虞見壁山有二鹿隨之
秋七月皇太子元膺殺太子少保唐襲元膺建次子也初
名宗懿後更名宗坦建得銅牌子于什仿有文二十餘字

建以為符讖因取以名諸子故又更曰元膺元膺為人獍
喙齧齒多材藝能射錢中孔嘗自抱畫毬擲馬上馳而射
之無不中年十七為皇太子判六軍創天武神機營開永
和府置官屬建以元膺年少任重以記事戒之令一切學
朕所為則可以保國又命道士廣成先生杜光庭為之師
唐襲建之嬖也元膺易之屢誣于朝建懼其交惡乃罷襲
樞密出為興元節度使已而襲罷歸元膺廷䟽其過失建
益不悅是月七夕元膺召諸王大臣置酒而集王宗翰樞
密使潘峭翰林學士毛錫文不至元膺怒曰集王不來峭
與文錫教之耳明日元膺白建峭及文錫離間諸王建怒

將罪之元膺出而襲入建以問之襲曰太子謀作亂欲召諸將諸王以兵錮之然後舉事爾建疑之襲請召屯營軍入衛元膺初不為備聞襲召兵以為誅已乃與伶人安悉香軍將喻全殊率天武兵自衛遣人擒峭及文錫而答之幽於其家召大將徐瑤常謙率兵出拒襲與襲戰神武門襲中流矢墜馬死建遣王宗賀以兵討之元膺兵敗皆潰去元膺匿躍龍池檻中明日出而丐食蜀人識之以告建遣宗翰招諭之宗翰未至為衛兵所殺建乃立其幼子鄭王宗衍為太子白龍見邛州江四年荆南高季昌侵蜀巫山遣王宗壽敗之于瞿唐八月殺黔南節度使王宗訓冬

南蠻攻掠界上建遣夔王宗範擊敗之于大渡河麟見昌州五年起壽昌殿於龍興宮畫建像於壁又起扶天閣畫諸功臣像十一月大火焚其宮室遣王宗儔等攻岐取其秦鳳階成四州至于大散關梁叛將劉知俊在岐於是以其族來通正元年遣王宗綰等率兵十二萬出大散關攻岐取隴州八月起文思殿以清資五品正員官購群書以實之以內樞密使毛文錫為文思殿大學士黃龍見大昌池十月大赦改元十二月又改明年元曰天漢國號漢天漢元年殺劉知俊十二月大赦改明年元曰光天復國號蜀光天元年六月建卒年七十二建晚多內寵賢妃徐氏

與妹淑妃皆以色進專房用事交結宦者唐文袞等干與外政建年老昏耄文袞判六軍事無大小皆決文袞及建疾以兵入宿衛謀盡去建故將故將大臣聞建疾皆不得入見久之宗弼等排闥入言文袞欲為變乃殺之建因以謂老將大臣多許昌故人必不為太子用思擇人未得而疾亟乃以宦者宋光嗣為樞密使判六軍而建卒太子立去宗名衍

衍宗化源建十一子曰衛王宗仁簡王元膺趙王宗紀幽王宗輅韓王宗智莒王宗持信王宗傑魯王宗鼎興王宗澤薛王宗平而鄭王宗衍最幼其母徐賢妃也以母寵得

立為皇太子開宗賢府置官屬後更曰天策府衍為人方頤大口垂手過膝顧目是耳頗知學問能為浮艷之詞元膺死建以幽王宗輅貌類已信王宗傑於諸子最材賢欲於兩人擇立之而徐妃專寵建老昏耄妃與宦者唐文袞教相士言衍最貴又諷宰相張格贊成之衍由是得為太子建卒衍立謚建曰神武聖文孝德明惠皇帝廟號高祖陵曰永陵建正室周氏號昭聖皇后後建數日而卒衍因尊其母徐氏為皇太后后妹淑妃為皇太妃太后太妃以教令賣官自刺史以下每一官闕必數人並爭而入錢多者得之通都大邑起邸店以奪民利衍年少荒淫委其政

於宦者宋光嗣光祿景潤澄王承休歐陽晃田魯傳等而
以韓昭潘在迎顧在珣嚴旭等為狎客起宣華苑苑有重
光太清延昌會真之殿清和迎仙之宮降真蓬萊丹霞之
亭飛鸞之閣瑞獸之門又作怡神亭與諸狎客婦人日夜
酣飲其中嘗以九日宴宣華苑嘉王宗壽以社稷為言言
發流涕韓昭等曰嘉王酒悲爾諸狎客共以慢言譎嘲之
坐上諠然衍不能省也蜀人富而喜遨當王氏晚年俗競
為小帽僅覆其頂俛首即墮謂之危腦帽衍以為不祥禁
之而衍好戴大帽每微服出游民間民間以大帽識之因
令國中皆戴大帽又好裹尖巾其狀如錐而後宮皆戴金

蓮花冠衣道士服酒酣免冠其髻髻然更施朱粉號醉粧
國中之人皆效之嘗與太后太妃游青城山宮人衣服皆
畫雲霞飄然望之若仙衍自作甘州曲述其仙狀上下山
谷衍常自歌而使宮人皆和之衍立之明年改元乾德乾
德元年正月祀天南郊大赦加尊號為聖德明孝皇帝二
年冬北巡至于西縣旌旗戈甲連亘百餘里其還也自閬
州江浮而上龍舟畫舸照耀江水所在供億人不堪命三
年正月還成都五年起上清宮塑王子晉像尊以為聖祖
至道王宸皇帝又塑建及衍像侍立於其左右又於正殿
塑玄宗皇帝及唐諸帝備法駕而朝之六年以王承休為

天雄軍節度使天雄軍秦州也承休以宦者得幸為宣徽使承休妻嚴氏有絕色衍通之是時唐莊宗滅梁蜀人皆皆懼莊宗遣李嚴聘蜀衍與俱朝上清而蜀都士庶簾帷珠翠夾道不絕嚴見其人物富盛而衍驕淫歸乃獻策代蜀明年唐魏王繼岌郭崇韜伐蜀是歲衍改元曰咸康衍自立歲常獵于子來山是歲又幸彭州陽平化漢州三學山以王承休妻嚴氏故十月幸秦州群臣切諫衍不聽行至梓潼大風發屋拔木太史曰此貪狼風也當有敗軍殺此我家物也何用獻為居數日為崇韜所殺宗壽許氏民家子也建以同姓錄之為子宗壽好學工琴奕為人恬退

喜道家之術事建時為鎮江軍節度使衍既立宗壽為太子太保奉朝請以煉丹養氣自娛衍為淫亂獨宗壽切諫之後為武信軍節度使唐師伐蜀所在迎降魏王常以書招之獨宗壽不降聞衍已銜壁大慟從衍東遷至岐陽以賄賂守者得入見衍衍泣下霑襟曰早從王言豈有今日衍死宗壽至澠池聞莊宗遇弒亡入熊耳山天成二年出詣京師上書求衍宗族葬之明宗嘉其忠以為保義軍行軍司馬封衍順正公許以諸侯禮葬宗壽得王氏十八喪葬之長安南三趙村

嗚呼自秦漢以來學者多言祥瑞雖有善辯之士不能祛

其惑也予讀蜀書至於龜龍麟鳳騶虞之類世所謂王者之嘉瑞莫不畢出於其國異哉然考王氏之所以興亡成敗者可以知之矣或以爲一王氏不足以當之則視時天下治亂可以知之矣龍之爲物也以不見爲神以升雲行天爲得志今偃然暴露其形是不神也不上于天而下見於水中是失職也然其一何多歟可以爲妖矣鳳凰鳥之遠人者也昔舜治天下政成而民悅命夔作樂樂聲和鳥獸聞之皆鼓舞當是之時鳳凰適至舜之史因并記以爲美後世因以鳳來爲有道之應其後鳳凰數至或出於庸君繆政之時或出於危亡大亂之際是果爲瑞哉麟獸之

遠人者也昔魯哀公出獵得之而不識蓋索而獲之非其自出也故孔子書於春秋曰西狩獲麟者譏之也西狩非其遠也獲麟惡其盡取也狩必書地而哀公馳騁所涉地多不可偏以名舉故書西以包衆地謂其舉國之西皆至也麟人罕識之獸也以見公之窮山竭澤而盡取至於不識之獸皆搜索而獲之故曰譏之也聖人已沒而異端之說興乃以麟爲王者之瑞而附以符命織緯詭恠之言鳳嘗出於舜以爲瑞猶有說也及其後出於亂世則可以知其非瑞矣若麟者前有治世如堯舜禹湯文武周公之世未嘗一出其一出而當亂世然則孰知其爲瑞哉龜玄物

也汚泥川澤不可勝數其死而貴於卜官者用適有宜爾
而戴氏禮以其在宮沼為王者難致之瑞戴禮雜出於諸
家其失亦以多矣騶虞吾不知其何物也詩曰吁嗟乎騶
虞賈誼以為騶者文王之囿虞虞官也當誼之時其說如
此然則以之為獸者其出於近世之說乎夫破人之惑者
難與爭於篤信之時待其有所疑焉然後從而攻之可也
麟鳳龜龍王者之瑞而出於五代之際又皆萃于蜀此雖
好為祥瑞之說者亦可疑也因其可疑者而攻之庶幾惑
者有以思焉

據前蜀書運曆圖九國志皆云建以唐天順二年入成
都為西川節度使天復七年九月建號明年正月改元
武成今以為定惟舊五代史云龍紀元年入成都天祐五年建號改元者
繆也至後唐同光三年蜀滅則諸書皆同自大順二年至同光三年凡三

十五
年

五代史記卷第六十三

五代史記卷第六十四

後蜀世家四

宋歐陽脩撰 徐無黨註

孟知祥字保胤邢州龍江人也其叔父遷當唐之末據邢
 洛磁三州為晉所虜晉王以遷守澤潞梁兵攻晉遷以澤
 潞降梁知祥父道獨留事晉而不顯及知祥壯晉王以其
 弟克讓女妻之以為左教練使莊宗為晉王以知祥為中
 將使前此為中門使者多以罪誅知祥懼求他職莊宗會
 知祥薦可代己者知祥因薦郭崇韜自代崇韜德之知祥
 遷馬步軍都虞候莊宗建號以太原為北京以知祥為太
 原尹北京留守魏王繼岌伐蜀郭崇韜為招討使崇韜臨

訣白曰即臣等平蜀陛下擇帥以守西川無如孟知祥者
已而唐兵破蜀莊宗遂以知祥為成都尹劍南西川節度
副大使知祥馳至京師莊宗戒有司盛供帳多出內府珍
奇諸物以宴勞之酒酣語及平昔以為笑樂歎曰繼岌前
日乳具兒爾乃能為吾平定兩川吾徒老矣孺子可喜然
益令人悲爾吾憶先帝弃世時疆土侵削僅保一隅豈知
今日奄有天下九州四海奇珍異產充牣吾府因指以示
知祥曰吾聞蜀王之富無異於此以卿親賢故以相付同
光四年正月戊辰知祥至成都而崇韜已死魏王繼岌引
軍東歸先鋒康延孝反攻破漢州知祥遣大將李仁罕會

任圜董璋等兵擊破延孝知祥得其將李肇侯弘實及其
兵數千以歸而莊宗崩魏王繼岌死明宗入立知祥乃訓
練兵甲陰有王蜀之志益置義勝定遠驍銳義寧飛掉等
軍七萬餘人命李仁罕趙廷隱張業等分將之初魏王之
班師也知祥率成都富人及王氏故臣家得錢六百萬緡
以犒軍其餘者猶二百萬任圜自蜀入為相兼判三司素
知蜀所餘錢是冬知祥加拜侍中乃以太僕卿趙季良齎
官告賜之因以為三川制置使督蜀犒軍餘錢送京師且
制置兩川征賦知祥怒不奉詔然知祥與季良有舊遂留
之樞密使安重誨頗疑知祥有異志思有以制之初知祥

鎮蜀莊宗以宦者焦彥賓為監軍明宗入立悉誅宦者罷諸道監軍彥賓已罷重誨復以客省使李嚴為監軍嚴前使蜀既歸而獻策代蜀蜀人皆惡之而知祥亦怒曰焦彥賓以例罷而諸道皆廢監軍獨吾軍置之是嚴欲以蜀再為功也掌書記毋昭裔及諸將吏皆請止嚴無內知祥曰吾將有以待其來嚴至境上遣人持書候知祥知祥盛兵見之異嚴懼而不來嚴聞之自若天成二年正月嚴至成都知祥置酒召嚴是時焦彥賓雖罷猶在蜀嚴於懷中出詔示知祥以誅彥賓知祥不聽因責嚴曰今諸方鎮已罷監軍公何得來此目客將王彥銖執嚴下斬之明宗不能

詰初知祥鎮蜀遣人迎其家屬于太原行至鳳翔鳳翔節度使李從曠聞知祥殺李嚴以為知祥反矣遂留之明宗既不能詰而猶欲以恩信懷之乃遣客省使李仁矩慰諭知祥并送瓊華公主及其子昶等歸之知祥因請趙季良為節度副使事無大小皆與參決三年唐徙季良為果州團練使以何瓚為節度副使知祥得制書匿之表留季良不許乃遣其將雷廷魯至京師論請明宗不得已而從之是時瓚行至緜谷懼不敢進知祥乃奏瓚為行軍司馬是歲唐師伐荆南詔知祥以兵下峽知祥遣毛重威率兵三千戍夔州已而荆南高季興死其子從誨請命知祥請罷

成兵不許知祥諷重威以兵鼓譟潰而歸唐以詔書劾重威知祥奏請無効由是唐大臣益以知祥為必反四年明宗將有事于南郊遣李仁矩責知祥助禮錢一百萬緡知祥覺唐謀困已辭不肯出久之請獻五十萬而已初魏王繼岌東歸留精兵五千戍蜀自安重誨疑知祥有異志聽言事者用已所親信分守兩川管內諸州每除守將則以精兵為其牙隊多者二三千少者不下五百人以備緩急是歲以夏魯奇為武信軍節度使分東川之閬州為保寧軍以李仁矩為節度使又以武虔裕為縣州刺史仁矩與東川董璋有隙而虔裕重誨表兄由是璋與知祥皆懼以謂唐將致討自璋鎮東川未嘗與知祥通問於是璋始遣人求婚以自結而知祥心恨璋欲不許以問趙季良季良以謂宜合從以拒唐知祥乃許於是連表請罷還唐所遣節度刺史等明宗優詔慰諭之長興元年二月明宗有事于南郊加拜知祥中書令初知祥與璋俱有異志而安重誨信言事者以為璋盡忠於國獨知祥可疑重誨猶欲倚璋以圖知祥是歲九月董璋先反攻破閬州擒李仁矩殺之是月應聖節知祥開宴東北望再拜俯伏嗚咽泣下沾襟士卒皆為之歔歔明日遂舉兵反是秋明宗改封瓊華公主為福慶長公主有司言前世公主受封皆未出降無

遣使就蕃冊命之儀詔有司草具新儀乃遣祕書監劉岳
為冊使岳行至鳳翔聞知祥反乃旋明宗下詔削奪知祥
官爵命天雄軍節度使石敬瑭為都招討使夏魯奇為副
知祥遣李仁罕張業趙廷隱將兵三萬人會瑭攻遂州別
遣侯弘實將四千人助瑭守東川又遣張武下峽取渝州
唐師攻劔門殺璋守兵三千人遂入劔門璋來告急知祥
大駭遣廷隱分兵萬人以東已而聞唐軍止劔州不進喜
曰使唐軍急趨東川則遂州解圍吾勢沮而兩川搖矣今
其不進吾知易與爾十二月敬瑭及廷隱戰于劔門唐師
大敗張武已取渝州武病卒其副將袁彥超代將其兵又

取黔州二年正月李仁罕克遂州夏魯奇死之知祥以仁
罕為武信軍留後遣人馳魯奇首示敬瑭軍敬瑭乃班師
利州李彥珂聞唐軍敗東歸乃弃城走知祥以趙廷隱為
昭武軍留後李仁罕進攻夔州刺史安崇阮弃城走以趙
季良為留後是時唐軍涉險以餉道為艱自潼關以西民
苦轉饋每費一石不能置一斗道路嗟怨而敬瑭軍既旋
所在守將又皆弃城走明宗憂之以責安重誨重誨懼遽
自請行而重誨亦以被讒得罪死明宗以謂致知祥等反
由重誨失策及重誨死乃遣西川進奏官蘇愿進奉軍將
杜紹本西歸招諭知祥具言知祥家屬在京師者皆無恙

知祥聞重誨誅死而唐厚待其家屬乃邀璋欲同謝罪璋曰孟公家屬皆存而我子孫獨見殺我何謝為知祥三遣使往見璋璋不聽乃遣觀察判官李昊說璋璋益疑知祥賣已因發怒以語侵昊昊乃勸知祥攻之而璋先襲破知祥漢州知祥遣趙廷隱率兵三萬自將擊之陣雞距橋知祥得璋降卒衣以錦袍使持書招降璋璋曰事已及此不可悔也璋軍士皆譟曰徒曝我於日中何不速戰璋即麾軍以戰兵始交偏將張守進來降知祥乘之璋遂大敗走過金鴈橋麾其子光嗣使降以保家族光嗣哭曰自古豈有殺父而求生者乎寧俱就死因與璋俱走知祥遣趙廷

隱追之不及璋走至梓州見殺光嗣自縊死知祥遂并有東川然自璋死知祥卒不遣使謝唐唐樞密使范延光曰知祥雖已破璋必借朝廷之勢以為兩川之重自非屈意招之彼亦不能自歸也明宗曰知祥吾故人也本因間諜致此危疑撫吾故人何屈意之有先是克寧妻孟氏知祥妹也莊宗已殺克寧孟氏歸于知祥其子環留事唐為供奉官明宗即遣環歸省其母因賜知祥詔書招慰之知祥兼據兩川以趙季良為武泰軍留後李仁罕武信軍留後趙廷隱保寧軍留後張業寧江軍留後李肇昭武軍留後季良等因請知祥稱王以墨制行事議未決而環至蜀知

祥見環倨慢九月環自蜀還得知祥表請除趙季良等為五鎮節度其刺史以下得自除授又請封蜀王且言福慶公主已卒明宗為之發哀遣閣門使劉政恩為宣諭使政恩復命知祥始遣其將朱滉來朝四年二月癸亥制以知祥檢校太尉兼中書令行成都尹劍南東西兩川節度管内觀察處置統押近界諸蠻兼西山八國雲南安撫制置等使遣工部尚書盧文紀冊封知祥為蜀王而趙季良等五人皆拜節度使唐兵先在蜀者數萬人知祥皆厚給其衣食因請送其家屬明宗詔諭不許十一月明宗崩明年閏正月知祥乃即皇帝位國號蜀以趙季良為司空同中

書門下平章事同中書門使王處回為樞密使李昊為翰林學士三月唐潞王舉兵於鳳翔愍帝遣王思同等討之思同兵潰山南西道節度使張虔釗武定軍節度使孫漢韶皆以其地附于蜀四月知祥改元曰明德六月虔釗等至成都知祥宴勞之虔釗奉觴起為壽知祥手緩不能舉觴遂病以其子景為皇太子監國知祥卒謚為文武聖德英烈明孝皇帝廟號高祖陵曰和陵

景知祥第三子也知祥為西川節度使景為行軍司馬知祥僭號以景為東川節度使同中書門下平章事知祥病景監國知祥已卒而祕未發喪王處回夜過趙季良相對

泣涕不已季良正色曰今疆侯握兵專伺時變當速立嗣君以絕非望泣無益也處回遂與季良立景而後發喪景立不改元仍稱明德至五年始改元曰廣政明德三年三月焚惑犯積尸景以謂積尸蜀分也懼欲禳之以問司天少監胡韞韞曰按十二次起井五度至柳八度爲鶉首一次鶉首秦分也蜀雖屬秦乃極南之表爾前世火入鬼其應多在秦晉咸和九年三月火犯積尸四月雍州刺史郭權見殺義熙十四年火犯鬼明年雍州刺史朱齡石見殺而蜀皆無事景乃止景好打球走馬又爲方士房中之術多採良家子以充後宮樞密副使韓保貞切諫景大悟即日出之賜保貞金數斤有上書者言臺省官當擇流清景歎曰何不言擇其人而任之左右請以其言詰上書者景曰吾見唐太宗初即位獄吏孫伏伽上書言事皆見嘉納李何勸我拒諫耶然景年少不親政事而將相大臣皆知祥故人知祥寬厚多優縱之及其事景益驕蹇多踰法度務廣第宅奪人良田發其墳墓而李仁罕張業尤甚景即位數月執仁罕殺之并族其家是時李肇自鎮來朝杖而入見稱疾不拜及聞仁罕死遽釋杖而拜廣政九年趙季良卒張業益用事業仁罕甥也仁罕被誅時業方掌禁兵景懼其反乃用以爲相業兼判度支置獄于家務以酷

法厚歛蜀人蜀人大怨十一年景與匡聖指揮使安思謙
謀執而殺之王處回趙廷隱相繼致仕由是故將舊臣迨
盡景始親政事於朝堂置匭以通下情是時契丹滅晉漢
高祖起于太原中國多故雄武軍節度使何建以秦成階
三州附于蜀景因遣孫漢韶攻下鳳州於是悉有王衍故
地漢將趙思綰據永興王景崇據鳳翔反皆送款于景景
遣張虔釗出大散關何建出隴右李廷珪出子午谷以應
思綰景相母昭裔切諫以為不可然景志欲窺關中甚銳
乃遣安思謙益兵向東已而漢誅思綰景崇虔釗等皆罷
歸而思謙耻於無功多殺士卒以威衆景與翰林使王藻

謀殺思謙而邊吏有急奏藻不以時聞輒啓其封景怒之
其殺思謙也藻方侍側因并擒藻斬之十二年置吏部三
銓禮部貢舉十三年景加號睿文英武仁聖明孝皇帝封
子玄詰秦王判六軍事次子玄珪襲王弟仁毅襲王仁贄
雅王仁裕嘉王十八年周世宗伐蜀攻自秦州景以韓繼
勳為雄武軍節度聞周師來伐歎曰繼勳豈足以當周兵
耶客省使趙季札請行乃以季札為秦州監軍使季札行
至德陽聞周兵至遽馳還奏事景召問之季札惶懼不能
道一言景怒殺之乃遣高彥儔李廷珪出堂倉以拒周師
彥儔大敗走青泥於是秦成階鳳復入于周景懼分遣使

者聘于南唐東漢以張形勢二十年世宗以所得蜀俘歸之景亦歸所獲周將胡立于京師因寓書于世宗世宗怒景無臣禮不答三十一年周兵伐南唐取淮南十四州諸國皆懼荆南高保融以書招景使歸周景以前嘗致書世宗不答乃止景幼子玄寶生七歲而卒太常言無服之殤無贈典景問李昊曰晉唐德宗皇子評生四歲而卒贈揚州大都督封肅王此故事也景乃贈玄寶青州大都督追封遂王二十五年立秦王玄詰為皇太子景幸晉漢之際中國多故而據險一方君臣務為奢侈以自娛至於溺器皆以七寶裝之宋興已下荆潭景益懼遣大程官孫遇

以蠟丸書間行東漢約出兵以撓中國遇為邊吏所得太祖皇帝遂詔伐蜀遣王全斌崔彥進等出鳳州劉光乂曹彬等出歸州詔八作司度右掖門南臨汴水為景治第一區凡五百餘間供帳什物皆具以待景景遣王昭遠趙彥韜等拒命昭遠成都人也年十三事東郭禪師智誣為童子知祥嘗飯僧於府昭遠執巾履從智誣以入知祥見之愛其惠黠時景方就學即命昭遠給事左右而見親狎景立以為捲簾使樞密使王處回致仕景以樞密使權重難制乃以昭遠為通奏使知樞密使事然事無大小一以委之府庫金帛恣其所取不問景母李太后常為景言昭遠

不可用景不聽昭遠好讀兵書以方畧自許兵始發成都
景遣李昊等餞之昭遠手執鐵如意指揮軍事自比諸葛
亮酒酣謂昊曰吾之是行何止克敵當領此二三萬雕面
惡少兒取中原如反掌爾景又遣子玄喆率精兵數萬守
劔門玄喆輦其愛姬攜樂器伶人數十以從蜀人見者皆
竊笑全斌至三泉遇昭遠擊敗之昭遠焚吉柏江浮橋退
守劔門軍頭向韜得蜀降卒言來蘇小路出劔門南清彊
店與大路合全斌遣偏將史延德分兵出來蘇北擊劔門
與全斌夾攻之昭遠彥韜敗走皆見擒玄喆聞昭遠等敗
亦逃歸劉光乂攻夔州夔州守將高彥儔戰敗閉牙城拒

守判官羅濟勸其走彥儔曰吾昔不能守秦川今又奔北
雖人主不殺我我何面目見蜀人乎又勸其降彥儔不許
乃自焚死而蜀兵所在奔潰將師多被擒獲景問計於左
右老將石頤以謂東兵遠來勢不能久宜聚兵堅守以敵
之景歎曰吾與先君以溫衣美食養士四十年一旦臨敵
不能為吾東向放一箭雖欲堅壁誰與吾守者耶乃命李
昊草表以降時乾德三年正月也自興師至景降凡六十
六日初昊事王衍為翰林學士衍之亡也昊為草降表至
是又草馬蜀人夜表其門曰世修降表李家當時傳以為
笑景至京師拜檢校太師兼中書令封秦國公七日而卒

追贈楚王其母李氏為人明辯甚見優禮詔書呼為國母
嘗召見勞之曰母善自愛無戚戚思蜀他日當送母歸李
氏曰妾家本太原儻得歸老故鄉不勝大願是時劉鈞尚
在太祖大喜曰俟平劉鈞當如母願杲之卒也李氏不哭
以酒酹地祝曰汝不能死社稷苟生以取羞吾所以忍死
者以汝在也吾今何用生為因不食而卒其餘事具國史

知祥興滅年數甚明諸書皆同蓋自同光三年乙酉入蜀至皇朝乾德三年乙丑國滅凡四十一年惟舊五代史云同光三年丙戌至乾德三年乙丑四十年者繆也

五代史記卷第六十四

五代史記卷第六十五

南漢世家五

宋歐陽脩撰 徐無黨註

劉隱其祖安仁上蔡人也後徙閩中商賈南海因家焉父
謙為廣州牙將唐乾符五年黃巢攻破廣州去略湖湘間
廣州表謙封州刺史賀江鎮遣使以禦梧桂以西歲餘有
兵萬人戰艦百餘艘謙三子曰隱台巖謙卒廣州表隱代
謙封州刺史乾寧中節度使劉崇龜死嗣薛王知柔代為
帥行至湖南廣州將盧琚覃玘作亂知柔不敢進隱以封
州兵攻殺琚玘迎知柔知柔辟隱知軍司馬其後徐彥若
代知柔表隱節度副使委以軍政彥若卒軍中推隱為留

後天祐二年拜隱節度使梁開平元年加檢校太尉兼侍
中二年兼靜海軍節度安南都護三年加檢校太師兼中
書令封南平王隱父子起封州遭世多故數有功於嶺南
遂有南海隱復好賢士是時天下已亂中朝人士以嶺外
最遠可以避地多游焉唐世名臣謫死南方者徃徃有子
孫或當時仕宦遭亂不得還者皆客嶺表王定保倪署劉
濬李衡周傑楊洞潛趙光胤之徒隱皆招禮之定保容管
巡官曙唐太學博士濬崇望之子以避亂徃衡德裕之孫
唐右補闕以奉使徃皆辟置幕府待以賓客傑善星曆唐
司農少卿因避亂徃隱數問以災變傑耻以星術事人嘗

稱疾不起隱亦客之洞潛初為邕管巡官秩滿客南海隱
常師事之後以為節度副使及龔僭號為陳吉凶禮法為
國制度略有次序皆用此數人焉乾化元年進封隱南海
王是歲卒年三十八弟龔立

龔初名嚴謙庶子也其母段氏生龔於外舍謙妻韋氏素
妬聞之怒拔劍而出命持龔至將殺之及見而悸劍輒墮
地良久曰此非常兒也後三日卒殺段氏養龔為己子及
長善騎射身長七尺垂手過膝隱為行軍司馬龔亦辟薛
王府諮議叅軍隱鎮南海龔為副使隱卒龔代立乾化二
年除清海軍節度使檢校太保同平章事三年加檢校太

傳末帝即位悉以隱官爵授龔龔封南海王唐末南海最
後亂僖宗以後大臣出鎮者天下皆亂無所之惟除南海
而已自隱始亦自立是時交州曲顥桂州劉士政邕州華
廣略容州龐巨昭分據諸管盧光稠據虔州以攻嶺上其
弟光睦據潮州子延昌據韶州高州刺史劉昌魯新州刺
史劉潛及江東七十餘寨皆不能制隱攻韶州龔曰韶州
所賴者光稠擊之虔人必應應則首尾受敵此不宜直攻
而可以計取隱不聽果敗而歸因盡以兵事付龔龔悉平
諸寨遂殺昌魯等更置刺史卒出兵攻敗盧氏取潮韶又
西與馬殷爭容桂殷取桂管虜士政龔取容管逐巨昭又

取邕管隱龔自梁初受封爵稟正朔而已貞明三年龔即
皇帝位國號大越改元曰乾亨追尊安仁文皇帝謙聖武
皇帝隱襄皇帝立三廟置百官以楊洞潛為兵部侍郎李
衡禮部侍郎倪曙工部侍郎趙光胤兵部尚書皆平章事
光胤自以唐甲族耻事偽國常怏怏思歸龔乃習為光胤
手書遣使間道至洛陽召其二子損益并其家屬皆至光
胤驚喜為盡心焉龔性聰悟而苛酷為刀鋸支解剗剔之
刑每視殺人則不勝其喜不覺柔順垂涎呀呻人以為真
蛟蜃也又好奢侈悉聚南海珍寶以為玉堂珠殿二年祀
天南郊大赦境內改國號漢龔初欲僭號憚玉定保不從

遣定保使荆南及還懼其非已使倪曙勞之告以建國定保曰建國當有制度吾入南門清海軍額猶在四方其不取咲乎龔笑曰吾備定保久矣而不思此宜其譏也三年冊越國夫人馬氏為皇后馬氏楚王殷女也四年春置選部貢舉放進士明經十餘人如唐故事歲以為常七年唐莊宗入汴龔懼遣宮苑使何詞入詢中國虛實稱大漢國主致書大唐皇帝詞還言唐必亂不足憂龔大喜又性好夸大嶺北商賈至南海者多召之使升宮殿示以珠玉之富自言家本咸秦耻王蠻夷呼唐天子為洛州刺史是歲雲南驃信鄭旻遣使致朱髻白馬以求婚使者自稱皇親

毋弟清容布燮兼理賜金錦袍虎綾紋攀金裝刀封歸仁慶侯食邑一千戶持節鄭昭淳昭淳好學有文辭龔與游燕賦詩龔及群臣皆不能逮遂以隱女增城縣主妻旻八年作南宮王定保獻南宮七竒賦以美之龔初名巖又更曰陟九年白龍見南宮三清殿改元白龍又更名龔以應龍見之祥有胡僧言讖書滅劉氏者龔也龔乃採周易飛龍在天之義為龔字音儼以名焉四年楚人以舟師攻封州封州兵敗於賀江龔懼以周易筮之遇大有遂赦境內改元曰大有遣將蘇章以神弩軍三千救封州章以兩鐵索沉賀江中為巨輪於岸上築堤以隱之因輕州迎戰陽

敗而奔楚人逐之章舉巨輪挽索鎖楚舟以彊弩夾江朕
之盡殺楚人三年遣將李守鄴梁克貞攻交趾擒曲承美
承美至南海龔登儀鳳樓受俘謂承美曰公常以我為偽
廷今反面縛向也承美頓首伏罪乃赦之承美顥子也克
貞又攻占城掠其寶貨而歸四年愛州楊廷藝叛攻交州
刺史李進遜歸龔遣承旨程寶攻廷藝寶戰死五年封子
耀樞邕王龜圖康王洪度秦王洪熙晉王洪昌越王洪弼
齊王洪雅韶王洪澤鎮王洪操萬王洪杲循王洪暉息王
洪邈高王洪簡同王洪建益王洪濟辨王洪道貴王洪照
宜王洪政通王洪益定王九年遣將軍孫德成攻蒙州不
克十年交州牙將皎公羨殺楊廷藝自立廷藝故將吳權
攻交州公羨來乞師龔封洪操交王出兵白藤以攻之龔
以兵駐海門權已殺公羨逆戰海口植鐵檣海中權兵乘
潮而進洪操逐之潮退舟還轆檣者皆覆洪操戰死龔收
餘衆而還十五年龔卒年五十四謚天皇大帝廟號高祖
陵曰康陵子玠立

玠初名洪度封秦王龔子耀樞龜圖皆早死玠次當立龔
病卧寢中召右僕射王翻與語呼洪度洪熙小字曰壽雋
雖長然皆不足任吾事惟洪昌類我吾欲立之柰何吾子
孫不肖後世如鼠入牛角勢當漸小爾因泣下歔歔翻為

龔謀出洪度以邕州洪熙容州然後立洪昌為太子議已
定崇文使蕭益入問疾龔以告之益諫曰少者得立長者
爭之禍始此矣由是洪度卒得立更名玠改元曰光天尊
母趙昭儀為皇太妃以晉王洪熙輔政玠立果不能任事
龔在殯召伶人作樂飲酒宮中裸男女以為樂或衣墨縑
與娼女夜行出入民家由是山海間盜賊競起妖人張遇
賢自稱中天八國王攻陷循州玠遣越王洪昌循王洪杲
攻之遇賢圖洪昌等於錢帛館禪將萬景忻陳道庠力戰
挾二王潰圍而走玠莫能省嶺東皆亂洪熙日益進聲妓
誘玠為荒恣玠亦頗疑諸弟圖已敕宦官守宮門入者皆

露索洪熙洪杲洪昌陰遣陳道庠養勇士劉思潮譚令禪
林少彊少良何昌廷等習為角觝以獻玠玠宴長春宮以
閤之玠醉起道庠與思潮等隨至寢門拉殺之盡殺其左
右玠立二年年二十四謚曰殤弟晟立

晟初名洪熙封晉王既殺玠遂自立改元曰應乾以洪昌
為兵馬元帥知政事洪杲副元帥劉思潮等封功臣晟既
殺兄立不順懼衆不伏乃益峻刑法以威衆已而洪杲屢
請討賊陰勸晟誅思潮等以止外議晟大怒使使者夜召
洪杲洪杲知不免乃留使者入具沐浴詣佛前祝曰洪杲
誤念來生王宮今見殺矣後世當生民家以免屠害涕泣

與家人訣別然後赴召至則殺之冬晟祀天南郊改元曰
乾和群臣上尊號曰大聖文武大明至道大光孝皇帝二
年夏遣洪昌祠襄帝陵於海曲至昌華宮晟使盜刺殺之
晟自殺洪杲由是與諸弟有隙而洪昌最賢龔素所欲立
者晟尤忌之故先及害鎮王洪澤居邕州有善政是歲鳳
皇見邕州晟怒使人酖殺之而諸弟相次見殺三年殺其
弟洪雅又殺劉思潮等五人思潮等死陳道庠懼不自安
其友鄧伸以荀悅漢紀遺之道庠莫能曉伸罵曰憨獠韓
信誅而彭越醢皆在此書矣道庠悟益懼晟聞之大怒以
道庠伸下獄皆斬之於市夷其族以右僕射王翻為英州
刺史使人殺之於路五年晟弟洪弼洪道洪益洪濟洪簡
洪建洪暉洪照同日皆見殺六年遣工部郎中知制誥鍾
允章聘楚以求婚楚不許允章還晟曰馬公復能經畧南
土乎是時馬希廣新立希萼起兵武陵湖南大亂允章具
言楚可攻之狀晟乃遣巨象指揮使吳珣內侍吳懷恩攻
賀州已克之楚人求救珣鑿大阱於城下覆箔於上以土
傅之楚兵逼城悉陷阱中死者數千楚人皆走珣等攻桂
州及連宜嚴梧蒙五州皆克之掠全州而還九年冬又遣
內侍潘崇徹攻郴州李景兵亦在與崇徹等遇戰大敗景
兵於宜章遂取郴州晟益得志遣巨艦指揮使暨彥贇以

兵入海掠商人金帛作離宮游獵故時劉氏有南宮大明
昌華甘泉玩華秀華玉清太微諸宮凡數千不可悉紀宦
者林延遇宮人盧瓊仙內外專恣為殺戮晟不復省嘗夜
飲大醉以瓜置伶人尚玉樓項拔劍斬之以試劍因并斬
其首明日酒醒復召玉樓侍飲左右白已殺之晟歎息而
已十年湖南王進達以兵五萬率溪洞蠻攻郴州潘崇徹
敗達於蝮石斬首萬餘級十一年晟病甚封其子繼興衛
王旋興桂王慶興荆王保興祥王崇興梅王十二年晟親
耕藉田交州吳昌濬遣使稱臣求節鉞昌濬者權子也權
自龔時據交州龔遣洪操攻之洪操戰死遂并不復攻權

死子昌岌立昌岌卒弟昌濬立始稱臣於晟晟遣給事中
李璣以旌節招之璣至白州昌濬使人止璣曰海賊為亂
道路不通璣不果行晟殺其弟洪邈十三年又殺其弟洪
政於是龔之諸子盡矣顯德三年世宗平江北晟始惶恐
遣使修貢於京師為楚人所隔使者不得行晟憂形於色
又嘗自言知星末年月食牛女間出書占之歎曰吾當之
矣因為長夜之飲十六年卜葬域於城北運甕為壙晟親
臨視之是秋卒年三十九謚曰文武光聖明孝皇帝廟號
中宗陵曰昭陵子鋹立

鋹初名繼興封衛王晟卒以長子立改元曰大寶晟性剛

五石史第...
忘不能任臣下而獨任其嬖倖宦官宮婢延遇瓊仙等至
錕尤愚以謂群臣皆自有家室顧子孫不能盡忠惟宦者
親近可任遂委其政於宦者龔澄樞陳延壽等至其群臣
有欲用者皆闔然後用澄樞等既專政錕乃與宮婢波斯
女等淫戲後宮不復出省事延壽又引女巫樊胡子自言
玉皇降胡子身錕於內殿設帳幄陳寶貝胡子冠遠遊冠
衣紫霞裾坐帳中宣福呼錕為太子皇帝國事皆決於
胡子盧瓊仙龔澄樞等爭附之胡子乃為錕言澄樞等皆
上天使來輔太子有罪不可問尚書左丞鍾允章參政事
深嫉之數請誅宦官宦官皆反目二年錕祀天南郊前三

日允章與禮官登壇四顧指麾宦者許彥真望見之曰此
謀反耳乃拔劍升壇允章迎叱之彥真馳走告允章反錕
下允章獄遣禮部尚書薛用丕治之允章與用丕有舊因
泣下曰吾今無罪自誣以死固無恨然吾二子皆幼不知
父寃俟其長公可告之彥真聞之罵曰反賊欲使而子報
仇邪復入白錕并捕二子繫獄遂族誅之陳延壽謂錕曰
先帝所以得傳陛下者由盡殺群弟也勸錕稍誅諸王錕
以為然殺其弟桂王璇興是歲建隆元年也錕將邵廷珪
言於錕曰漢乘唐亂居此五十年幸中國有故干戈不及
而漢益驕於無事今兵不識旗鼓而人主不知存亡夫天

下亂久矣亂久而治自然之勢也今聞真主已出必將盡
有海內其勢非一天下不能已勸銀修兵為備不然悉珎
寶奉中國遣使以通好銀憎然莫以為慮惡廷珎言直深
恨之四年芝菌生宮中野獸觸寢門苑中羊吐珠井旁石
自立行百餘步而仆樊胡子皆以為符瑞諷群臣入賀五
年銀以宦者李托養女為貴妃專寵托為內太師居中專
政許彥真既殺鍾允章惡龔澄樞等居已上謀殺之澄樞
使人告彥真反族誅之七年王師南伐克郴州晟所遣將
暨彥贊與其刺史陸光圖皆戰死餘眾退保韶州銀始思
廷珎言遣廷珎以舟兵出洗口抗王師會王師退舍廷珎

訓士卒修戰備嶺人倚以為良將有譖者投無名書言廷
珎反銀遣使者賜死士卒排軍門見使者訴廷珎無反狀
不能救為立祠於洗口八年交州吳昌文卒其佐呂處珎
與峯州刺史喬知祐爭立交趾大亂驩州丁璉舉兵擊破
之銀授璉交州節度九年南海民妻生子兩首四臂是時
太祖皇帝詔李煜諭銀使稱臣銀怒囚煜使者龔慎儀十
三年詔潭州防禦使潘美出師師次白霞銀遣龔澄樞守
賀州郭崇岳守桂州李托守韶州以備是歲秋潘美平賀
州十月平昭州又平桂州十一月平連州銀喜曰昭桂連
賀本屬湖南今北師取之足矣其不復南也其愚如此十

二月平韶州開寶四年正月平英雄二州銀將潘崇徹先
降師次瀧頭銀遣使請和求緩師二月師度馬逕銀遣其
右僕射蕭淮奉表降淮行銀惶迫復令整兵拒命美等進
師銀遣其弟祥玉保興率文武詣美軍降不納龔澄樞李
托等謀曰北師之來利吾國寶貨亦焚為空城師不能駐
當自還也乃盡焚其府庫宮殿銀以海船十餘悉載珍寶
嬪御將入海宦官樂範竊其舟以逃歸師次白田銀素衣
白馬以降獻俘京師赦銀為左千牛衛大將軍封恩赦侯

其後事具國史

隱興滅年世諸書皆同蓋自唐天祐二年隱為廣州節度使至皇朝開寶四年國滅凡六十七年舊

五代史以梁貞明二年龔潛號為始故曰五十五年尔

五代史記卷第六十五

聖